

ማርቆስ ዓፊዳ ኑ ጎዳ ዩሱስ ኪርስቶስ ሚሺራቾ ቃላ ጊዳ ቆፋ

ማርቆስ ሚሺራቾ ቃላይ “ሃይሲ ያሳ ና ዩሱስ ኪርስቶስ ሚሺራቾ ቃላስ ኮይሮ” ጉሳን ደሚስ። ሃይሳ ሃ ሚሺራቾ ቃላዛ ጊዳን ዩሱሲ ኦሳንቻኔ ኢዚ ጎዳተላራ ዲዛይ ጊድ ሺቁዳስ። ጎዳተላይካ ኢዛ ተሚርቲን፣ ዳይዳንላታ ቦላ ዲዛ ዎልቃኒኔ ኢዚ ኣሳ ናጋራ ኣቶ ጊዳይሳን ኤሬቲዳስ። ዩሱሲ “ኣሳ ናጋራ ኣይሌተላፊ ኮሲ ኤካናሰ ታ ሽምፖ ኣሳ ጊሽ ኣላ ኢማናሰ ዩዳ ኣሳ ናይ ታና” ጊዲ ባርካ ዮተዳስ።

ማርቆስ ዩሱሳ ታሪኬ ሺሺዳይ ቆንጩኒኔ ዎልቃይ ኩሚዳ ኦጌራ ጊዲሺን ኢዚ ተሺ ሂሰቲ ያሊዳይ ዩሱሳ ቃላኔ ኢዛ ተሚርቲዛ ጊዳንታ ኢዚ ኦሊዳ ጊታ ማላታ ኦሶታ። ኢዚ ዓማቁዛ ዮሃኒሳ ጊሽ፣ ዩሱሳ ዪንቃቲ ጊሺኔ ኢዚ ኤኪዳ ሜቶዛ ጊሽ ቃንላራ ዮተዳፔ ጉዩን ዩሱሲ ታማርሲዳ ተሚርቲዛ ጊሺኔ ኢዚ ሃርጋንቻታ ፓሊዳይሳ ቢርሽ ዮቴሰ። ዩሱሳ ካሊዛይቲ ጉዩፔ ዩሱሳ ሎዔሊ ኤሪ ኤሪ ቢዳ ማላ ዩሱሳራ ኤቁቲዛይቲ ቃሴ ዩሱሳ ካሴፔ ኣሊ ኢዪ ኢዪ ቢዳ። ማፃፋሰ ወርሴላ ሽምፖቲ ዩሱሲ ቢታ ቦላ ዳዒዳ ወርሴላ ላይላን ወርሴላ ሳሚንታን ፖሌቲዳ ኦሶታ፤ ሃራፔካ ኢዛ ካቁቲላ ጊሺኔ ኢዛ ዳንላ ጊሽ ዮቴቲሰ።

ማርቆስ ሚሺራቾ ቃላስ ወርሴላን ዲዛ ናምዑ ኪፊሌቲ ኢሲ ኢሲ ማፃፋታን ዓላላ ዳቴሰ።

- ሃ ማፃፋይ ኦይኪዳ ኩሚላ ቆፋ
- ሚሺራቾ ቃላስ ኮይሮ ደሚሳ 1:1-13
- ዩሱሲ ባ ኦሶ ኮይሮ ጋሊላን ደሚዳሰ 1:14-9:50
- ዩሩሳላሚን ዩሱሳ ኦሶ 10:1-52
- ዩሩሳላሚኒኔ ሃ ሄራን ወርሴላ ሳሚንታን ዩሱሳ ጋኪዳ ሜቶ 11:1-15:47
- ሃይቆፔ ጎዳ ዳንሊ 16:1-8
- ሃይቆፔ ዳንዲዳ ጎዳ ቆንጩሊኔ ፑዴ ሳሎ ቡስ 16:9-20

ፃግቀዛ የሃኒሳ ማርካቴል
(ማቶ 3:1-12፤ ሉቃ 3:1-18፤ ዮሃ 1:19-28)

1 ያሳ ና ዩሱስ ከርስቶሳ ኮይሮ ሚሺራቸይ ሃይሳ፤ * 2 ናቤ ኢሳያሳ ባጋራ

“ሄኮ ኔስ ኦጌ ሎዔላናዳ ታ ከታናዳ ኔፔ ሲንላራ ዩዳና። *

3 “ሳዳስ ኦጌ ጊሊሲቴ፤ ኢዚ ባና ኦጌ ሱሪሲዲ ኦሊቴ” ጊሼ ባዞ ቢታን ዋሲዛ ጊሪስ”

ጌቴቲ ፃፊቲዳስ። *

4 ሄሳሉካ ፃግቀዛ የሃኒሲ አሳ ፃግቀሽኔ “ኢንቴ ናጋራፔ ሲሚዲ ፃግቀቲቴ፣ ያሲ ኢንቴ ናጋራ አቶ ጋና” ጊ አዋጂሽ ባዞራ ኬዚ ዋቋዳስ። 5 የሁዳ ዳሬይ ኩሜል ዩሩሳላሜ አሳይ ዉሪ የሃኒሳኮ ቢ ቢዲ ባ ናጋራ ናጋራ ፓዲ ፓዲ ዮርዳኖሴ ሻፋን የሃኒሳ ኩሽን ፃግቀቲዳስ። 6 ሄ ዋዳ የሃኒሲ ማይዲዛይ ጋሜላ ኢሲኬፔ ኦሴቲዳ ማይያ፤ ቃሴ ባ ያሳን ተ ዳሮ ጊዳስ። ኢዚ ሚዛ ቁማይ ቦሌኔ ዳጌራ ኤሳ። * 7 ኢዚ “ታኒ ሆካዳ ኢዛ ጫማ ቃሾ ቢርሻናስ ቤሶንታዳይ፣ ታፔ አቋዛዳይ ታፔ ጉዩራ ያና። 8 ታኒ ኢንቴና ሃላን ፃግቃይስ ኢዚ ጊዲኮ ኢንቴና ዲሎ አያናን ፃግቃና” ጊዲ ሳባኪዳስ።

ዩሱሳ ፃግቀቲሴኔ ፓጩቴል

9 ሄ ዋዳ ዩሱሲ ጋሊላ ጊዶን ዲዛ ናዚሬቴ ጌቴቲዛ ካታማይፔ ዮርዳኖሴ ሻፋ ዩዲ የሃኒሳ ኩሽን ፃግቀቲዳስ። 10 ዩሱሲ ፃግቀቲዲ ሃላፊ ኬዚዳ ማላ ሳሎይ ዶዩቲን ዲሎ አያናይ ኢዛ ቦላ ሃራጴ ካሮ ሚሳቲዲ ዋቋሽን ቤዩዳስ። 11 ቃሴካ “ታ ደሲዛ ናይ ኔና፣ ኔናን ታ ኡፋዩታይስ” ጊዛ ቃላ ጊሪሲ ፑዳ ሳሎፔ ሴቴቲዳስ። *

12 ሄራካ ዲሎ አያናይ ኢዛ ዲጌ ባዞ ካሌላ ኤፊዳስ። 13 ሄን ባዞንካ ኦይዲ ታሙ ጋላስ ጋካናስ ፃላዔራ ፓጩቴሽ ጋምዒዳስ። ደባታራ ኢሲፌ ዳዒዳስ። ከታንቻቲካ ኢዛ ማዲዳ።

* 1:1 ኢሲ ኢሲ ጌሻ ማፃፋታን ያሳ ና ጊዛ ቃላዚ ፃፊቲቤና። * 1:2 ሚል 3:1 * 1:3 አሳ 40:3 † 1:6 ያሳ ጉሲ ኢሲ ኢሲ ጋዎ አሳታ ቃላራ ዳባ ጌቴቲስ። * 1:6 2ካዎ 1:8 * 1:11 ሜዴ 22:2፤ ማዛ 2:7፤ ኢሳ 42:1፤ ማቶ 3:17፤ 12:18፤ ማር 9:7፤ ሉቃ 3:22

ዩሱሲ ሞሌ ኦይኪዛ ኦይዲ አሳታ ባና ካላና ማላ ዪይጊዴስ 14-15 ዮሃንሲ ቃሾ ከሌ ጌሊዲይሳፊ ጉዬ ዩሱሲ ያሳ ሚሺራቾ ቃላ ሳባኪሼ ጌዴ ጋሊላ ቢዲ “ዎዴይ ጋኪዴስ፤ ያሳ ካዎቲሌ ማቲዴስ፤ ናጋራፔ ሲሚቲ፣ ሚሺራቾ ቃላን አማንቲ” ጊዲ ሳባኪዴስ።

16 ዩሱሲ ጋሊላ አባ አቻራ አዲን ሲሞናይኔ ኢዛ አሻ አንዲራሲ ሞሌ ኦይኪዛይታ ጊዲዳ ገሽ ኢስቲ ሞሌ ኦይኪዛ ጌቲ አባን ዩጊሽን ቤዪዴስ። 17 ዩሱሲ ኢስታ “ሃ ዪቲ! ታና ካሊቲ፤ አንቲ ሞሌ ኦይኪ ሽሽዛ ማላ ታ አንቲና አሰ ኦይኪዛይታ ኦላና” ጊዴስ። 18 ኢስቲ ሄራካ ሞሌ ጌቲዛ ዩጊ አጊዲ ዩሱሳ ካሊዲ።

19 ጉሌ ጌዴ ሲንሌ አዲዲ ዛቢዶሳ ና ያቆቤይኔ ኢዛ አሻ ዮሃንሲ ዎጎሎን ኡቲዲ ሞሌ ጌቲ ገገሲሽን ቤዪዲኔ ሄራካ ኢስታ ዪይጊዴስ። 20 ኢስቲካ ባ አዎ ዛቢዶሳስ ቃፃፊቲዲ አሌዛ አሳታራ ኢሲፌ ዎጎሎዛ ጊዶን አጊዲ ዩሱሳ ካሊ ቢዲ።

ቱና አያናይ ኢዛ ቦላ ዲዛዴ ዩሱሲ ፓሌዴስ

21 ሄፔካ ቁፊርናሆሚ ቢዲ። ሄራካ ዩሱሲ አይሁዳታ ሳሞባታ ጋላስ አይሁዳታ ዎሳ ከሌ ጌሊዲ ታማርሶ ኦይኪዴስ። † 22 ፃፊታ ማላ ጊዶንታ ጎዳቲላራ ዲዛ አሳ ማላ ኢዚ ታማርሲን አሳይ ወሪ ኢዛ ቲሚርቲዛን ማላሌቲዴስ።

23 ሄ ዎዴ አይሁዳታ ዎሳ ከላን ዲዛ ቱና አያናይ ኢዛ ቦላ ዲዛ ኢሲ አዴይ 24 “ናዚሬቲ ዩሱሳ ኔ ኑፔ አዚ ኮያይ? ኑና ዳይሳና ያዲ? ኔ ኦናኮኔ ታ ኔና ኤራይስ፤ ኔኒ ያሳ ጌሻዛ” ጊዲ ዋሲዴስ።

25 ዩሱአሲካ ቱና አያናዛ “ጮቡ ጋዳ ኢዛፔ ከዛ!” ጊዲ ሃንቂዴስ።

26 ቱና አያናይ አዴዛ ጌንዴርሲዲ ኢዚ ቃከቲሽን ኢዛፔ ዋሲሾ ከዚዴስ። 27 ዴሬይ ወሪ “አሶ ሃይሲ አዛ ፓላ? ሃይሲ ጎዳቲላራ ዲዛ ኦራላ ቲሚርቲ፤ ቱና አያናታካ አዛዜስ፤ ኢስቲካ ኢዛስ አዛዜቲቲስ” ጊ ማላሌቲሾ አሳይ ባ ጊዶን ኢሶይ አሳ ኦይሾቾ ኦይኪዴስ።

28 ሄራካ ኢዛ ኦሶ ዎሬይ ኩሜላ ጋሊላ ዩሾን ዲዛ ዴሬ ኡባን ሲዬቲዴስ።

ዩሱሲ ዳር ሃርጋንቻታ ፓሌዴስ

† 1:21 አይሁዳታ ዎሳ ከሌ ገዛይሳ አማራሶ ቃላን “ሚኩራቢ” ጌቲቲስ።

29 አይሁዳታ ዋሳ ከላፌ ከዚያ ማላ ያቆቤራኔ የሃረሳራ ኢሲፌ ጌዴ ሲሞናሶኔ እንዲራሳሶ ጌሊዳ። 30 ሄ ጌሊዳ ማላ ሲሞና ሶሎቴያ ሚሻ ሃርጌ ሳኬታዳ አቺዳይሳ ኢዛሰ የቲዳ። 31 ሄሳ ጊሽ ዩሱሲ ኢዚኮ ሺቁዲ ኢዚ ኩሼ ኦይኪዲ ዳንሊዳሰ። ሚሻይ አገን ኢዛ ዳንዳዳ ኢሰታ ሞካዲሰ።

32 አዋ አርሼይ ወሊዳፔ ጉዬ ጋዴይ ቋሚሺን አሳይ ሃርጋንቻታኔ ዳይዳንሊ ኦይኪዳ አሳ ወርሲ ዩሱሳኮ ኤኪ ዩዳሰ።

33 ሄ ካታማዩን ዲዛ አሳይ ወሪ ከላ ካሪን ሺቁዳሰ። 34 ኢዚካ ዲማ ዲማ ሃርጌን ሳኬቲዳይታ ዳርታ ፓሊዳሰ። ዳር ዳይዳንሳታካ ኬሲዳሰ። ጊዶ አቲን ዳይዳንሳቲ ዩሱሲ ኦናኮኔ ኤሪዛ ጊሽ ዳይዳንሳቲ ሃሳያና ማላ ዩሱሲ ኮይቤና።

ዩሱሲ ጋሊላን ሚሺራቾ ቃላ ታማርሲዳሰ

35 ባዞይ ዘዖንታ ማላዶ ዎንታራ ዩሱሲ ዳንዲዲ ኢሲ አሲ ባይንዳሶ ቢዲ ሄን ዋሳ ኦይኪዳሰ። 36 ሲሞኒኔ ኢዛራ ዲዛይቲ ዩሱሳ ኮያና ከዚ ቢዳ። 37 ኢሰቲ ኢዛ ዳሚዲ አሲ ወሪ ኔና ኮሻን ዳሰ ጊዳ።

38 ዩሱሲካ “ታ ዩዳይ ታማርሳናሰ ጊዲዳ ጊሽ አኔ ሚሺራቾ ቃላ የታናሰ ማታን ዲዛ ጉታታ ሶሰ” ጊዳሰ።

39 ሄሳ ጊሽ አይሁዳታ ዋሳ ከላን ጌሊ ጌሊ ሳባኪሼኔ ዳይዳንሊ ኬሲሼ ጋሊላ ኩሜላን ዩዩዳሰ።

ዩሱሲ እንቺራቻ ሃርጊዛዴ ፓሊዳሰ

40 ኢሲ እንቺራቻ ሃርጊዛዴይ ዩሱሳኮ ሺቁዲኔ ኢዛ ሰንላን ጉልባቲዲ “ኔ ሼኔ ጊዲኮ ኔ ታና ፓላና ዳንዳያሳ” ጊ ዎሲዳሰ።

§ 41 ዩሱሲካ አዳዛሰ ሚሼቲዲ ባ ኩሼ ዩዲ ኢዛ ሶቺዲኔ “ታ ኔ ፓፃና ማላ ኮያይሰ፤ ፓፃ!” ጊዳሰ።

42 ሄራካ አዳዛ እንቺራቻ ሃርጌይ አገን፣ አዳዚ ፓፂዳሰ።

43-44 ዩሱሲካ አዳዛሰ “አናሰካ ሃይሳ ኔ ሃሳዮንታ ማላ ናጌታ፤ ጊዶ አቲን ባዳ ቁሴሰ ኔና ቤሳ። ዴሬዛሰ ማርካ ጊዳና ማላ ኔ ፓፂዳይሳሰ ሙሴይ አዛዚዳ ያርሾዛ ሺሻ” ጊዲ ከሄ ሚንላ የቲዳሰ።

45 ጊዶ አቲን አዳዚ ከዚ ቢዲ ባ ቢዳ ኡባሶን ዎሪ ዳርሲ ቋርጨዳሰ። ሄሳ ጌዶን ዩሱሲ አይ ካታማንካ ቆንጨራ

§ 1:40 ንቺራቻ ጌሻ ማፃፋይ ቆንጨሲዛ ማላ አሳቴላ ሶላ ሶላራ ጋልባን ከዚዛ ዲማ ዲማ ሃርጌታ ኡባ ቤሴሰ።

ጌላናስ ዳንዳይቤና። ሄሳፌ ዳንዳይሳን ካታማፔ ካሬራ እሲ ባይንዳሶን ዲስ ኦይኪዳስ። አሳይ ጊዲኮ ደማ ደማሶፔካ ኢዛኮ ዪዳስ።

2

ዩሱሲ ቶሆ ሲላ አዳዛ ፓሊዳስ
(ማቶ 9:1-8፤ ሉቃ 5:17-26)

1 ጉላ ጋላሳፌ ጉዬ “ዩሱሲ ቂፊርናሆሜ ሲሚዲ ሶን ዳስ” ጊዛ ዋሬ አሳይ ሲዪዳስ። 2 ሄሳ ጊሽ ከላራ ካሬራ ኡተዛሶይ ጳያና ጋካናስ ዳር ዳሬይ ሸቂዳስ። ኢዚካ ያሳ ቃላ አሳስ ሳባኪዳስ። 3 ኦይዱ አስ ዳይቲ ኢሲ ቶሆይ ሲሊዳ አስ ቶኪዲ ኢዛኮ ኤሂዳ። 4 አሳ ዳርቴላፌ ዳንዳይሳን ዩሱሲ ዲዛሶ ጋላናስ ዳንዳዮንታ ጊሽ ዩሱሲ ዲዛ ጊናራ ካራ ቃሪዲ ሃርጋንቻዛ ኢዚ ኢቺዳ ሃላራ ዩሱሳ ሲንሐ ዲጌ ዋሊዳ። * 5 ዩሱሲ አሳታ አማኖ በዪዲ ቶሆይ ሲሊዳ አዳዛ “ታ ናዙ! ኔ ናጋራይ አቶ ጌቴቲዳስ” ጊዳስ።

6-7 ሄን ጋዳን ኡቲዳ ኢሲ ኢሲ ሙሴ ዋጋ ያፌቲ ባ ዋዝናራ ሃይሲ አዳዚ ዋሰቲ ሃይሳሶ ጊዜ? “ያሳ ሶላ ጫሻ ቃላ ሃሳዬስ። ኢሲ ያሳፌ አቲን ናጋራ ማራና ዳንዳይዛይ ኦኔ?” ጊዲ ቆፒዳ።

8 ዩሱሲ ሄራካ ኢሲቲ ባ ዋዝናን ቆፒዳይሳ ባ አያናን ኤሪዲ “ኢንቲ ዋሰቲ ሃይሳሶ ቆፒቲ? 9 ቶሆይ ሲሊዳ አዳዛ፤ ‘ኔ ናጋራይ አቶ ጌቴቲዳስ’ ጉሳፌኔ ‘ዳንዳዳ ኔ ሃላ ቶካዳ ባ ጉሳፌ አዋይሲ ማቲዜ?’ 10 ጊደ አቲን አሳ ናስ ቢታ ሶላን ናጋራ ማራና ጎዳቴሌ ዲዛይሳ ኢንቲ ኤራና ማላ” ጊዲ ቶሆ ሲላ አዳዛ፤ 11 “ዳንዳዳ ኔ ቶኬታ ዪዳ ሃላ ቶካዳ ኔሶ ባ” ጊዳስ።

12 ኢዚካ ዳንዳዲ አሳይ ወሪ በዪሺን ሃላ ቶኪዲ ቢዳስ። ሄን ጋዳን ዲዛ አሳይ ወሪ ሃኖዛን ማላሌቲዲ “ካሴ ሃይሳ ማላይ ሃኒን በይሶኮ” ጊዲ ያሴ ጋላቲዳስ።

ዩሱሲ ለዌ ያይጊዳስ
(ማቶ 9:9-13፤ ሉቃ 5:27-32)

13 ቃሴካ ዩሱሲ ጋሊላ አባ ላንቄ ቢዳስ። ዳር ዳሬይ ኢዛኮ ዪን ኢዚካ ዪዳ አሳ ታማርሲዳስ። 14 ኢዚ ኦኔራ አቋ ቢሺን ኢልፊዮሳ ና ለዌይ ቃሪፃ ሸሺዛሶን ኡቲዳይሳ በዪዲ “ሃያ ታና ካላ” ጊዳስ። ኢዚካ ዳንዳዲ ዩሱሳ ካሊዳስ።

* 2:4 ሃላራ ጊዛይሳ ኢሲ ኢሲ ባጋ ጋዋሎ ቃላራ ዛጸራ ጌቴስ።

15 ሄሳፌ ጉዬ ለዌ ሶን ካላ ማዳን ኡቲ ዲሺን ቃራፃ ሺሺዛ ዳር አሳቲኔ ናጋራንቻቲ ኢዛራ ካሊ ዪዳ ገሽ ኢስቲ ዩሱሳራኔ ኢዛ ካሊዛይታራ ኢሲፌ ማዳን ኡቲዳ። 16 ፋርሳዌታ ባጋፌ ገዲዳ ሙሴ ዋጋ ታማርሲዛይቲ ዩሱሲ ናጋራንቻታራኔ ቃራፃ ሺሺዛይታራ ሚሺን ቤዪዲ ኢዛ ካሊዛይታ “ቃራፃ ቃንዲሲዛይታራኔ ናጋራንቻታራ አዛስ ሚዜ?” ገዲ ኦይቺዳ።

17 ዩሱሲካ ኢስቲ ገዛይሳ ሲይዲ “አኪሜይ ሃርጋንቻታስ ኮሽሶ አቲን ሃርጎንታይታስ ገዳና። ታካ ናጋራንቻታ ጃይጋናስ ያዲሰ አቲን ጂሎታ ጃይጋናስ ያቤኬ” ገዳሰ።

ፆማ ገሽ ሺቂዳ ኦይሾ
(ማቶ 9:14-17፤ ሉቃ 5:33-39)

18 ዮሃንሳ ካሊዛይቲኔ ፋርሳዌቲ ፆማ ፆሜቴሰ። ኢሲ ኢሲ አሳቲ ዩሱሳኮ ዪዲ “ዮሃንሳ ካሊዛይቲኔ ፋርሳዌታ ካሊዛይቲ ፆሜቴሰ ሺን ኔና ካሊዛይቲ አዛስ ፆሜቴኔ?” ገ ኦይቺዳ።

19 ዩሱሲካ ኢስታስ “ሚሺራይ ኢስታራ ዲሺን ሚሺራ ላጌቲ ፆሚ ኤሪዞ? ሚሺራይ ኢስታራ ዲሺን ፆሚ ኤሬቴና። 20 ሚሺራይ ኢስታፊ ኤኬታና ዋዳይ ያና። ሄ ዋዳ ኢስቲ ፆማና።

21 “ጋልዓ ማይያ ቦላ ኦራላ ዋሶ ዋሊ ሲኪዛዳይ ኦኒካ ዳና፤ ሄሳሶ ኦሊኮ ኦራላዚ ጋልዓ ዳኪ ዳኪ ዩጌሰ፤ ዳኬላይካ ካሴፔ ጌዳ አጂ ኢቴሰ። 22 ሄሳሶካ ኦራላ ዋይኔ ጫጃ ጋልዓ ሉካሞን ዋሊዛዳይ ዳና። ዋሊዛ ገዲኮ ዋይኔ ጫጃዚ ጋልዓ ሉካሞዛ ጱሴሰ፤ ዋይኔ ጫጃዚኔ ሉካሞዚ ናምዓይ ሞሬቴቴሰ። ሄሳ ገሽ ኦራላ ዋይኔ ጫጃይ ዳናሰ ቤሲዛይ ኦራላ ሉካሞና” ገዳሰ።

ሳምባታ ገሽ ሺቂዳ ኦይሾ
(ማቶ 12:1-8፤ ሉቃ 6:1-5)

23 ዩሱሲ አይሁዳታ ሳምባታ ጋላስ ገሰቲ ቲያ ገደራ አጂሺን ኢዛ ካሊዛይቲ ኢዛራ ኢሲፌ ቢሼ ቲያ ፀጶ ኦይኪዳ። *

24 ፋርሳዌቲ “ኔና ካሊዛይቲ ሳምባታ ጋላስ ዲጌቲዳ ሚሽ አዛስ ኦሊዞ?” ገዲ ዩሱሳ ኦይቺዳ።

25 ኢዚካ ኢስታስ “ዳወቴይ ጋፊዲ ሚዛ ሚሽ ኮይዳ ዋዳ ኢዛራ ኢሲፌ ዲዛይታራ ኢዚ ኦሊዳይሳ ናቤቢቤኬቲ? *

26 አቢያታሪይ ቄሴታ ሃላቃቴላን ዲሺን ኢዚ ያሳ ኮሌ ጌሊዲ

* 2:23 ዛሬ 23:25 * 2:25 1ሳሜ 21:1-6

ቄሴት ፃላላ ማናሰ በሲዛ ዲማ ካላ ባሲ ሚዲኔ ባናራ ዲዛይታስ ኢሚዴስ” ገደሰ። *

27 ቃሴካ ዩሱሲ ኢስታስ “ሳምባታይ አሳስ ሜዴቲዴስ አቲን አሲ ሳምባታስ ሜዴቲቤና። 28 ሄሳ ጊሽ ታ አሳ ናይ ሳምባታ ጎዳ” ገደሰ።

3

ዩሱሲ ኩሼይ ሲሊዳ አዳዛ ፓሊዴስ
(ማቶ 12:9-14፤ ሉቃ 6:6-11)

1 ሃራ ጋላስ ዩሱሲ አይሁዳ ዋሳ ኬጼ ጌሊዴስ። ሄንካ ኩሼይ ሲሊዳዴይ ዴስ። 2 ዩሱሳ ሞታናስ ጋሶ ኮዪዛ አሳቲ ኢዚ አይሁዳታ ሳምባታ ጋላስ ፓላናኮኔ ጊዲ ፓሊሺን ቤያና ኮይዳ።

3 ኢዚካ ኩሼይ ሲሊዳ አዳዛ “ሄን ሸቂ ኡቲዳ አሳ ሲንፋን ዴንዳ ኤቃ” ገደሰ። 4 ሄሳፌ ጉዬ ዩሱሲ አሳ “ሳምባታ ጋላስ በሲዛይ ሎፖ ኦሶዬ? ኢታ ኦሶ? አሳ ሼምፖ አሾዬ? ዋይኮ ሼምፖ ዋዶ?” ገዲ ኦይቸዴስ። ኢስቲካ ጮቡ ገዳ።

5 ኢስታ ዋዝና ሹቻቲፋን ሚሼቲዲ ኢዛ ገደሊዲ ዩዩ አዲ ኤቂዳ አሳ ሃንቆራ ያሊዲ አዳዛ “ኔ ኩሼዛ ፒዲሳ!” ገደሰ። አዳዚካ ባ ኩሼ ፒዲሲን ኩሼዚ ሙሌራ ፓሊዴስ። 6 ፋርሳዌቲ ኬዚ ቢዲ ኢዛ ዋስቲ ዳይሳናኮኔ ሄርዶሳ ባጋ ገዲዳ አሳታራ ዘሬቲዳ።

አባ ላንቄን ዳር አሳይ ዩሱሳኮ ሸቂዴስ

7 ዩሱሲ ባና ካሊዛይታራ አባኮ ቢዴስ። ጋሊላፔኔ ዩሁዳፔ ዩዳ ዳር ዴሬይ ኢዛ ካሊዴስ። 8 ኢዚ ኦሊዛይሳ ሲይዲ አሳይ ዩሁዳፔ፣ ዩሩሳላሚፔ፣ ኤዶሚፔ፣ ዮርዳኖሴ ፒንፋን ዲዛ ዴሬታፔ ቃሴ ያርሴፔኔ ሲዶና ሄራፔ ኢዛኮ ዩዴስ። 9 አሳይ ዳሪዳ ጊሽ ኢዛ ኡንዴሶንታ ማላ ጉሳ ዋጎሎ ኢስቲ ጊሺሳና ማላ ባና ካሊዛይታ አዛዚዴስ። 10 ኢዚ ዳር ሃርጋንቻታ ፓሊዳ ጊሽ ሳኮይ ዋይሲዛይቲ ዉሪ ኢዛ ባ ኩሼራ ቦቻናስ ዳፊቲዳ። * 11 ቱና አያናቲካ ዩሱሳ ቤዩዳ ማላ ኢዛ ሲንፋን ኩንዲዲ “ኔኔ ፆሳ ና” ገዲ ዋሲዳ።

12 ገደ አቲን ኢዚ ኦናኮኔ ቱና አያናቲ ቆንጩሶንታ ማላ ኬሂፔ ሃንቂዴስ።

* 2:26 ሉዌ 24:9 * 3:10 ማር 4:1፤ ሉቃ 5:1-3

ዩሱሲ ባና ካሊዛ ታማኔ ናምዓታ ደሪዳስ

(ማቶ 10:1-4፤ ሉቃ 6:12-16)

13 ዩሱሲ ፑዴ ዙማ ቦላ ኬዚዲ ባ ኮዩዛይታ ባኮ ያና ማላ ያይጊዴስ፣ ኢስቲካ ኢዛኮ ዩዳ። 14 ኢዛራ ኢሲፌ ጊዳና ማላኔ ሰባካናስ ዩዳና ማላ ታማኔ ናምዓታ “ሃዋሬታ” ጊ ሱንሊዳስ። 15 አሳፔ ዳይዳንላታ ኬሳና ማላ ኢስታስ ጎዳቴላ ኢሚዳስ።

16 ኢዚ ሱንሊዳ ታማኔ ናምዓታ ሱንሊ ሃይሳፌ ካሊዛይሳ፤ ጳፀርሳ ጌቴቲዳ ሲሞና፣ 17 ቢዖሪኔጌሴ ዎይኮ ዳዳ ናይታ ጌቴቲዳ ዛቢዳሳ ናይታ ያቆቤኔ ዮሃንሳ፣ 18 ኢንዲራሳ፣ ፒሊጶሳ፣ ባርቴሌሞሳ፣ ማቶሳ፣ ቶማሳ፣ ኢልጆዮሳ ና ያቆቤ፣ ታዶሳ፣ ባ ባጋስ ሚሼቲዛ ሲሞና፣ * 19 ዩሱሳ አላ ኢሚዳ አስቆርንቶ ዩሁዳ።

ዩሱሳኔ በዔሊዜቡላ

(ማቶ 12:22-32፤ ሉቃ 11:14-23፤ 12:10)

20 ሂሳፌ ጉዬ ዩሱሲ ኢሲ ሶ ጌሊዳስ። ኢዚኔ ኢዛ ካሊዛይቲ ካላ ማና ዎዴይ ኢስታስ ጳያና ጋካናስ ዴሬይ ቃሴካ ዳሪ ሸቄዳስ። 21 ኢዛ ሃኖታ ሲዩዳ ኢዛ ዳቦቲ “ጎዮንታ አጌና” ጊዲ ባናራ ኤኪ ባናስ ኢዚ ዲዛሶ ጋኪዳ።

22 ዩሩሳላሜፔ ዩዳ ፃፊቲካ “በዔሊዜቡላ ጌቴቲዛ ዳይዳንላታ ሃላቃይ ኢዛ ቦላ ዳስ። ኢዚ ዳይዳንላታ ኬሲዛይ ዳይዳንላታ ሃላቃ ዎልቃንኮ!” ጊዳ።

23 ኢዚካ ኢስታ ያይጊዲ ለሚሶራ “ፃላዔይ አሳፔ ፃላዔ ዎስቲ ኬሳኔ? 24 ባ ጊደን ሻኮይ ዲዛ ካዎቴላ ሚናናስ ዳንዳዬና። 25 ኢሲ ኬላ አሲካ ባ ጊደን ሻኬቲኮ ኤቃናስ ዳንዳዬና። 26 ሃሳቶካ ፃላዔይ ባ ጋራሳን ኢሶይ ኢሳራ ሻኬቲኮኔ ኢፃቲኮ ሚኒ ኤቃናስ ዳንዳዬና። ሂሲካ ኢዛስ ዉርሴላ ጊዳና።

27 “ሃሳ ጌደን ኢሳዳይ ኮይርቲዲ ዎልቃማ አስ ቃቾንታ ዲሼ ዎልቃማዛሶ ጌላናሲኔ ኢዛ ሚሼ ቦንቃናስ ዳንዳዬና፤ ኢዛ አቆ ቦንቃናስ ዳንዳዬቲዛይ ዎልቃማዛ ቃቾኮ ፃላላ።

28 “ታ ኢንቴስ ቱሙ ጋይስ፤ አሳ ናይታስ ናጋራይኔ ጫሺ ዉሪ ማሬታና። 29 ጊደ አቲን ፂሎ አያና ቦላ ጫሻ ቃላ ሃሳዩዛ አሳ ኡባስ ሜርናስ ናጋራ አጮ ጊዳና አቲን ማሬቴና” ጊዳስ። *

* 3:18 ባ ባጋስ ሚሼቲዛ፣ ሲሞና ሃይሲ ሃ ሱንላይ ጉጃቲዳይ ኢሲ ኢሲ አሳቲ ኢዚ ባ ሃይማኖቱዛስ ሚሼቲዛ ጊሻሳ ጌቴስ። ሃራይቲ ቃሴ ኢዚ ኢሲ አሳ አይሉቴላፌ ዎዚዛ ኢሲ ዲርጂቴ ጊደን ዲዛ ጊሻሳ ጌቴስ። * 3:29 ሉቃ 12:10

30 ሄሳ ኢዚ ጊዳይ ኢስቲ ኢዛ “ኔ ቦላ ቱና ኣያናይ ዳስ” ጊዳ ገሻሳ።

ዩሱሳ ኣዩዮን ኢዛ ኢሻታ
(ማቶ 12:46-50፤ ሉቃ 8:19-21)

31 ሄሳፌ ጉዬ ኢዛ ኣዩዮን ኢዛ ኢሻቲ ካሬ ዩ ኤቁዲኔ ኣሴ ኢዛኮ ከቲ ዓይጊሲዳ። 32 ኢዛ ዩዩ ኣጲ ኡቲዳ ዳር ኣሳይ “ሄኮ ኔ ኣዩዮን ኔ ኢሻቲ ካሬን ኤቁዲ ኔና ኮዩቲስ” ጊዳ።

33 ኢዚካ ዛሪዲ “ታ ኣያ ኦኔ? ታ ኢሻቲ ኦናንቲ?” ጊዳስ።

34 ኢዛ ዩዩ ኡቲዳ ኣሳኮ ያሊዲ “ታ ኣዩዮን ታ ኢሻቲ ሃይታንታኮ!

35 ያሳ ሸኔ ኦሊዛይ ዉሪ ኢዚ ታ ኢሻ፣ ታ ሚኾኔ ታ ኣዮ” ጊዳስ።

4

ዜሬላ ዜሪዛዳ ለሚሶ
(ማቶ 13:1-9፤ ሉቃ 8:4-8)

1 ቃሴ ዩሱሲ ሃራ ዎዳ ኣባ ኣቻን ታማርሶ ኦይኪዳስ። ኢዛኮ ከሂ ዳር ዳሬይ ሸቁዳ ገሽ ኣባ ጊዳን ዲዛ ዎጎሎ ዲዛሪን ጌሊዲ ኡቲዳስ፤ ኣሳይካ ዉሪ ኣባ ኣቻን ሸቁዳስ። * 2 ኢዚካ ዳር ዮዖታ ለሚሶ ሂዘጊ ታማርሲዳስ። 3 “ሲዩቲ! ኢሳዳይ ዜሬላ ዜሪናስ ከዚዳስ። 4 ኢዚ ዜሪሸን ኢሲ ኢሲ ዜሬላ ኦኔ ቦላ ዎጲዳስ። ኦኔ ቦላ ዎጲዳ ዜሬላ ካፎቲ ማዲ ሚዳ። 5 ባገይ ማላ ቢታን ዎጲዳስ። ሄ ቢታይ ማላ ጊዲዳ ገሽ ሄራካ ጫሪዳስ። 6 ጊዳ ኣቲን ኣዎ ኣርሼይ ከዚዳ ማላ ሹሊዲ ዓጰ ዩዶንታ ገሽ ማሊዳስ። 7 ቃሴ ኢሲ ዜሬላ ኣኹንላ ጊዳን ዎጲዳስ፤ ኣኹንላይካ ዲጩዲ ጩሊዳ ገሽ ኣይፊቤና። 8 ሃራ ዜሬላ ቃሴ ሎዖ ኦርዳ ቢታ ቦላ ዎጲዳ ገሽ ጫሪዲ ዲጩዳስ፤ ኣይፊካ ኣይፊዳስ፤ ኢሶይ ሄሹ ታሙ፣ ኢሶይ ቃሴ ኡሱቸን ታሙ፣ ኢሶይ ቃሴ ያቱ ኣይፊዳስ።”

9 ዩሱሲ ቃሴካ “ሲዩዛ ሃይላ ዲዛዳይ ሲዮ!” ጊዳስ።

ዩሱሲ ለሚሶራ ዮቲዛ ጋሶ
(ማቶ 13:10-17፤ ሉቃ 8:9-10)

10 ዩሱሲ ባርካ ዲሸን ታማኔ ናዎዓቲኔ ካሴ ኢዛራ ዲዛ ኣሳይ ኢዚ ዮቲዳ ለሚሶዛ ገሽ ኢዛ ዛሪ ኦይቺዳ። 11 ኢዚካ ኢስታስ “ኢንቲስ ያሳ ካዎቲላ ፀራ ኤርይ ጌሊዳስ ሸን ካሬን ዲዛይታስ ጊዲኮ ዮዖይ ዉሪ ለሚሶራ ዮቲቲስ። 12 ሄሲካ ካሴ

* 4:1 ሉቃ 5:1-3

ኢስቲ ቤዩዲ ቤዩዲይሳ ኣኬኮንታ ማላኔ ሲሞንታ ማላ፣ ቃሴካ ኢስታ ናጋራይ ማራቶንታ ማላኮ” ገደሰ።

13 ቃሴካ ዩሱሲ “ሃይሲ ለሚሶይ ኢንቴሰ ጌሊቤኔ? ሂሰቲን ሃራ ለሚሶ ኢንቴ ዋስቲ ኤራኔ? 14 ዜሪዛዳይ ቃላ ዜሬሰ። 15 ኢሲ ኢሲ ኣሳቲ ኦጌ ቦላ ዋዲዳ ዜሬላ ሚሳቴቴሰ፤ ኢስቲ ቃላ ሲዩዛ ዋዳ ፃላዔይ ዩዲ ሄራካ ኢስቲ ሲዩዳ ቃላ ኢስታ ዋዝናፔ ኤኪፔሰ። 16 ሄሳላካ ሃራቲ ሜላ ቢታ ቦላ ዋዲዳ ዜሬላ ሚሳቴቴሰ። ኢስቲ ቃላ ሲይዲ ኡፋይሳን ኤኬቴሰ። 17 ገደ ኣቲን ኢስቲ ፃጶ ዩደንታ ገሽ ጉላ ዋዳ ጋምዒሺን ቃላ ጌደን ሜቶይ ዋይኮ ጎዳታይ ኣሳታ ቦላ ዩዛ ዋዳ ሄራካ ጳጳቴቴሰ። 18 ሃራቲ ቃሴ ኣጉንሳ ገደን ዋዲዳ ዜሬላ ሚሳቴቴሰ፤ ኢስቲ ቃላ ሲሲ ሲዩቴሰ። 19 ገደ ኣቲን ሃ ቢታ ሜቶይ፣ ሚሻ ሲቆይኔ ሃራ ኣሞይ ኢስቲ ሲዩዳ ቃላ ጩሊዲ ኣይፌ ኣይፎንታ ማላ ዲጌሰ። 20 ሃንኮይቲ ሎዖ ቢታን ዜሬቲዳ ዜሬላ ሚሳቴቴሰ፤ ሄይቲካ ቃላ ሲይዲ ኤኪዛዳኔ ሄዡ ታሙ ኣይፌ፣ ኡሱፑን ታሙ ኣይፌኔ ፃቴ ኣይፌ ኣይፌዛይታ” ገደሰ።

ጌማን ዲዛ ፃምፔ
(ሉቃ 8:16-18)

21 ቃሴካ ዩሱሲ “ፃምፔ ኣይሊዲ ጌማሶን ዋይኮ ኣርሳ ገደን ዋሊ ኤሬቲ? ፖዓና ማላ ቆንጩሶን ዋሌታ ገደኔ? * 22 ሃሳ ገሽ ቆቴቲዲ ቆንጩ ኬዘንታይ፣ ፖዖን ኬዘንታ ጌማን ኣታናይ ባሞ። * 23 ሃሳ ገሽ ሲዩዛ ሃይሊ ዲዛዳይ ሲዮ!” ገደሰ።

24 ጉጂዲካ “ኢንቴ ሲዩዛይሳ ዋዝናን ዋሊቴ፤ ኢንቴ ማኪዛ ሚሻራ ኢንቴሰ ማኬታና፤ ሃሳፊካ ዳርይ ጉጃታና። * 25 ዲዛዳሰ ጉጃታና ሺን ባይንዳዳፌ ኢዛሰ ዲዛራካ ኤኬቲቻና” ገደሰ። *

ዲጩዛ ዜሬላ ለሚሶ

26 ቃሴካ ዩሱሲ “ፆሳ ካዋቴሊ ዜሬላ ዜሪዛ ኢሲ ኣሰ ሚሳታዉሰ። 27 ዜሪዳዳይ ኦማርሰ ጳሲኬሰ። ዋንቲሺን ዳንዳሰ፤ ገደ ኣቲን ኢዚ ኤሮንታ ዲሺን ዜሬቲዳ ካላይ ሞኪዲ ዲጩሰ። 28 ጋዳያካ ኮይሮ ጫሬቶ፣ ካሌላዳ ፑዴ፣ ቅሴካ ፑዴዛ ቦላ ሎዖ ኣይፌ ኢማዉሰ። 29 ካላይ ካዲዳፔ ጉዩ ቦኔይ ጋኪን ኬላ ኣዋይ ሄራካ ማፃ ኣይኬሰ” ገደሰ።

* 4:21 ማቶ 5:15፤ ሉቃ 11:33 * 4:22 ማቶ 10:26፤ ሉቃ 12:2 * 4:24 ማቶ 7:2፤ ሉቃ 6:38 * 4:25 ማቶ 13:12፤ 25:29፤ ሉቃ 19:26

ሳናፊጮኛ ጌቴቴዛ ማላ ኣይፌ ለሚሶ

30 ዬሱሲ “ዎሳ ካዋቴሉ ኑ ኣዛራ ገኒሳኔ? ኣዛራ ለሚሳኔ?

31 ቢታ ቦላ ኡባፌ ላፋ ገዲዳ ሳናፊጮኛ ኣይፌ ሚሳታዉስ።

32 ዜሬታዳ ዲጨዳፕ ጉዬ ቃስ ኣታኪልቲታ ኡባፌ ኣጲዛ ገሽ ካፎቲ ዩዲ ሄ ኣታኪልቲይ ሃጋታ ኩዋ ገደን ሹምፕቴስ” ገደስ።

33 ዬሱሲካ ኣሳይ ኤካናስ ዳንዳዩዛይሳ ኬና ሃይታ ሚሳቲዛ ሃራ ዳሮ ለሚሶራ ኢስታስ ዮቲደስ። 34 ኣይ ሚሽ ገዲኮካ ኣሳስ ለሚሶይ ባይንዳ ዮቲ ኤሬና። ኢዚኔ ኢዛ ካሊዛይቲ ፃላ ዲዛ ዋዴ ገዲኮ ዉርሲ ቢርሽ ዮቲስ።

35 ሄ ጋለስ ጋዴይ ቃሚሺን ባና ካሊዛይታ “ኣኔ ጌዴ ሄ ፒንላ ፒናስ” ገደስ። 36 ኢስቲ ኣሳ ሄን ኣጋገዲ ኢዚ ኡቲ ዲዛ ዋጎሎዛራ ዬሱሳ ኤኪ ቢዳ። ሃራ ዋጎሎቲካ ኢስታራ ኢሲፌ ዴቴስ። 37 ሄ ዋዴ ዋልቃማ ዳምባላይ ኣባ ቦላ ዴንዲዲ ዋጎሎዛ ሃላ ኩማና ጋካናስ ዳምባላይ ሾጮቹዴስ። 38 ገደ ኣቲን ዬሱሲ ቦርኮላ ቦርኮቲዲ ዋጎሎዛስ ጉዬ ባጋን ኢቹዴስ። ኢስቲካ ኢዛ ዴንሳዲ “ኣስታማሬ! ኑኒ ጳዩሺን ኔና ሜቴኔ?” ገደ።

39 ኢዚካ ዴንዲዲ ጫርኮዛ “ጮፀ ጋ!” ኣባካ “ዋፑ ጋ!” ገደስ፤ ጫርኮይካ ጮፀ ገደስ፤ ሙሉካ ጮፀ ገደስ። 40 ባና ካሊዛይታካ “ሃይሳላ ኣዛስ ባቢዳቲ? ሃይሳ ጋካናስ ኢንቴስ ኣማናይ ባዊ?” ገደስ።

41 ኢስቲካ ኬሂ ባቢዲ ባ ገደን ኢሶይ ኢሳራ “ጫርኮይኔ ኣባይ ኢዛስ ኣዛዜቲዛይ ሃይሲ ኦኔ?” ጌቴቲዳ።

5

ዬሱሲ ኢሲ ቱና ኣያናይ ኢዛ ቦላ ዲዛዴ ፓሌዴስ

(ማቶ 8:28-34፤ ሉቃ 8:26-39)

1 ኣባ ፒኒዲ ጌዴ ጌርጌሴኖኔ ጌቴቴዛሶ ቢዳ። 2 ዬሱሲ ዋጎሎዩፕ ዋጲዳ ማላ ቱና ኣያናይ ኢዛ ቦላ ዲዛዴይ ዲፎፕ ኬዚዲ ዬሱሳራ ጋጋና ኢዛኮ ዩዴስ። 3 ሃይሲ ኣዴዚ ዲፎሶን ዲዛዴኔ ሃራይ ኣቶሺን ኦኒካ ኢዛ ሳንሳላታንካ ቃቻናስ ዳንዳይቤና። 4 ዳሮ ዋዴ ቶሆ ቢራታራኔ ሳንሳላታራ ቃሹቴስ። ገደ ኣቲን ኩሹ ሳንሳላታ ዲፍላ ዬጌስ፤ ቶሆ ቢራታካ ማንፍሬላ ዬጌስ፤ ኦኒካ ኢዛ ኦይኪዲ ቲቃናስ ዳንዳይቤና። 5 ጋለሲኔ ቃማ ዲፎታ ገደኒኔ ዙማታ ቦላ ዩዩ ዩዩ ዋሲሹ ባ ቦላ ሹቻራ ቃንፃሬላዲ ማዲንፍስ።

6 ኢዚካ ዬሱሳ ሃሆን ቤዩዳ ማላ ዋላን ኢዛኮ ዩዲ ኢዛ ሲንላን ጉልባቲዲ ጎይኒዴስ። 7 ኬሂ ዋሲዲ “ሃይሶ ዋጋ ያሳ

ና ዩሱሳ፣ ኔስ ታናራ አዚ ዲዜ? ያሳ ሱንላን ታ ኔና ዋሳይስ ታና ዋይሶፓ” ጊዴስ።⁸ አዚ ሄሳ ጊዳይ ዩሱሲ ካሴ “ኔኒ ቱና አያናይ ሃይሳፌ ኬዛ” ጊዳ ገሻሳ።

⁹ ሃሳፌ ቃሴ ዩሱሲ አዛ “ኔ ሱንላ ኦኔ?” ጊዳ ኦይቹዴስ። አዚካ “ኔኒ ዳርታ ጊዳዳ ገሽ ታ ሱንላ ለጎኔ ጌቴቴስ” ጊዴስ።
*

¹⁰ ሄ ዴሬፔ ኬሲ ዩደንታ ማላ ዩሱሳ ኬሂ ዋሲዴስ።

¹¹ ሄን ማታን ዙማ ቦላ ዳር ጉዲንላ ሄሜቴስ።¹² ቱና አያናቲ “ኑ ጉዲንላታን ጌላና ማላ ኑስ ኤር ጋርኪ?” ጊዳ ዩሱሳ ዋሲዳ።

¹³ አዚካ አሰታስ “ኤር” ጊዴስ። ቱና አያናቲካ አዳዘፔ ኬዚዲ ጉዲንላታን ጌሊዳ። ናምቡ ሺ ጊዳዳ ጉዲንላይ ዉሪ አፎዛራ ዲጌላ ገንዳሬቲ ዋዲዲ አባን ሚቴቲዳ።

¹⁴ ጉዲንላ ሄሚዛይቲ ባቃቲዲ ሃኒዳይሳ ካታማኒኔ ዴሬ ጊደን ዮቲዳ። ዴሬይካ ሃኒዳይሳ ቤያናስ ባ ዲዛሶፔ ዲዛሶፔ ኬዚዴስ።

¹⁵ ዩሱሳኮ ዩዲ ዳር ዳይዳንላ አዛ ቦላ ዲዛ አዳዛ ዋዘናይ አዛስ ሲሚን ማይፆ ማይዒዲኔ ዋጋራ ኡቲዳይሳ ዩዳ አሳይ ቤዩዲ ባቢዴስ።¹⁶ ሃይሳ ቤዩዳ አሳይ ዳይዳንላ አዛ ቦላ ዲዛ አዳዛ ገሺኔ ጉዲንላቲ ሃኖይሳ ዴሬዛስ ዮቲዳ።

¹⁷ ሃሳፌ ጉዬ ሄ ዴሬ አሳይ ዩሱሲ አሰታ ዴሬ ዩዲዲ ባና ማላ ዋሲዴስ።

¹⁸ ዩሱሲ ዋጎሎን ጌሊሺን ዳይዳንላቲ አዛፔ ኬዚዳ አዳዚ ዩሱሳራ ዳናስ ዋሲዴስ።

¹⁹ ዩሱሲ ቃሴ አዚ ኦይቹዳይሳ አካይ ጊዲኔ “ኔኒ ጌዴ ኔ ሶ ባ፣ ጎዳይ ኔስ አይ ማላ ጊታ ሚሽ ኦሊዳኮኔ አዚ ኔስ ኦሊዳ ማርቴላ ኔ ሶ አሳስ ዮታ” ጊዴስ።

²⁰ አዳዚካ ባሶ ቢዲ ዩሱሲ አዛስ ኦሊዳ ጊታ ሚሽ ዉርሲ ታሙ ካታማ ጌቴቲዛ ዴሬን ዮቲን ሲዩዳይ ዉሪካ ማላሌቲዴስ።

²¹ ቃሴካ ዩሱሲ ዋጎሎን ጌሊዲ ጌዴ ፒንሐ ፒኒዲ አባ አቻን ዲሺን ዳር አሳይ አዛ አቹ ሺቁዲኔ አዛ ጊደሊዴስ።

²² አይሁዳታ ዋሳ ኬላ ሃላቃታፔ አሶይ አያዒርሳ ጌቴቲዛይሲ አዚ ዲዛሶ ቢዲ ዩሱሳ ዴሚዳ ማላ አዚ ቶሆ ቦላ ኩንዲዲ

²³ “ታስ ጉላ ና ዲዛራ ሃይቃና ጋዉስ። አዛ ሃይቆንታ ፓፃ ዳና ማላ ኔ ሃ ያዳ ኔ ኩሽ አዚ ቦላ ዋላርኪ?” ጊዳ ኬሂ ዋሲዴስ።

²⁴ ዩሱሲካ አዛራ አሲፌ ቢዴስ። ዳር አሳይ አዛ ኡንዔላና ጋካናስ ካሊዴስ።

* 5:9 ለጎኔ ጉሲ ዳር ዋታዳሪታ ቡቴ [ጨፊሪ] ጉሳ።

25 ታማኔ ናምዑ ላይሉ ኩሜሉ ሱሌ ኢዚ ቦላፌ ጉኪዛ ማጫሰ ዲዛራ ሂን አሳራ ዳወሰ።

26 ኢዛ ባሲ ዲዛ ሚሽ ወርሳ ኦንጋና ጋካናሰ አኪሚፕ አኪሚ ላሞን ዳሮ ዳቡራዲሰ። ጊዶ ኣቲን ሳኮይ ኢዚሰ ጌዴ ዳሪዴሰ ኣቲን ኣይኮካ ሎሲቤና። 27 ኢዛ ዩሱሳ ገሽ ሲዱዳ ማላ አሳ ጊዶራ ዩሱሳ ጉዩራ ካላዳ ኢዛ ማይዎ ቦቻዲሰ። 28 ጋሶይካ “ታ ኣይ ሃናዳካ ኢዛ ማይዎ ኩሹራ ቦቻ ቦቻዳኮካ ታ ፓፃና” ጋዳ ቆፕዳ ገሻሳ።

29 ጉኪዛ ሱላይ ሄራካ ኤቂ አገዴሰ፤ ኢዛካ ፓፂዳይሳ ባ አሳቴላን ኤራዲሰ። 30 ባፔ ዋልቃይ ኬዚዳይሳ ዩሱሲ ኤሪዲ ጌዴ አሳኮ ሰሚዲ “ታ ማይዎ ኦኔ ቦቻዳይ?” ጊዴሰ።

31 ኢዛ ካለዛይቲ ቃሴ “ሃይሲ ዳሬይ ኡንዔቲዲ ሱጌቲሺን ቤያሽ ዋናዳ ‘ታና ቦቻዳይ ኦኔ?’ ጋይ” ጊዴ።

32 ዩሱሲ ሄሳ ኦሊዳይ ኦናኮኔ ቤያናሰ ዩሺ ያሊዴሰ።

33 ማጫሳያካ ባሰ አዚ ዋኒዳኮኔ ኤራዳ ባባሽኔ ኮኮራሽ ያዳ ዩሱሳ ሲንላን ጉፋናዳ ሃኒዳ ቱማ ወርሳ ኢዛሰ ዮታዲሰ።

34 ኢዚካ “ታ ናዩ! ኔ አማናይ ኔና አሽዴሰ። ሳርን ባ! ኔ ዋዩፔ ፓፃ!” ጊዴሰ።

35 ዩሱሲ ቡሮ ሃሳያን ዲሺን ኣይሁዳታ ዋሳ ኬሌ ሃላቃ ኢያዲሮሳ ሶፔ ዩዲ ኢያዲሮሳሰ “ኔ ናያ ሃይቃዲሰ፣ ጎዳ ማላ ኣዛሰ ዳቡሪሳይ?” ጊዴ።

36 ጊዶ ኣቲን ዩሱሲ ኢሰታ ሃሳያ ለፒ ሂሰቲዲ ኣይሁዳታ ዋሳ ኬላ ሃላቃዛ “ኔ አማኖ ፃላ አማና ኣቲን ባቦፋ!” ጊዴሰ።

37 ጳፀሮሳ ያቆቤራኔ ያቆቤ ኢሻ ዮሃኒሳፔ ኣቲን ሃራይ ኦኒካ ኢዛ ካላና ማላ ኮይቤና። 38 ጌዴ ኣይሁዳታ ዋሳ ኬላ ሃላቃ ሶ ጋኪዳ ማላ አሳይ ዋሲሽ ጫሞ ዩሆ ዩኪዛይሳ ቤዩዴሰ። 39 ሶ ጌሊዲ “ሃይሲ ወሪ ኣዛ ዋሶኔ ኣዛ ዩሆ? ናያ ጲሰካዲሰ ኣቲን ሃይቃቤይኩ” ጊዴሰ።

40 ቃሴ አሳይ ወሪ ኢዛ ቦላ ሚጫዴሰ፤ አሳ ወርሲካ ኬላፌ ኬሲዲ ናይ ኣዋኔ ናይ ኣዩዮ ቃሴካ ኢዛራ ኢሲፌ ዩዳይታ ኢዛ ካለዛይታ ፃላ ካሌሊዲ ናያ ዲዛ ሶ ጌሊዴሰ። 41 ናይ ኩሽካ ኦይኪዲ “ፃቢታ ኩሞ!” ጊዴሰ። “ፃቢታ ኩሞ” ጉሳሰ ቢርሸሌ “ሃኔ ናዩ፣ ዴንዳ” ጉሳ።

42 ናያካ ሄራካ ዴንዳ ኤቃዲሰ፤ ሄኔ ሃኔ ሃሙታዲሰ። ኢዚሰካ ላይላይ ታማኔ ናምዑ ላይላ፤ አሳይካ ሄ ሃናዛን ዳሮ ማላሌቲዴሰ። 43 ዩሱሲ ሃይሳ ኦኒካ ኤርንታ ማላ ኬሂ ሚንሌ ዮቲዴሰ፤ “ናይሰ ማና ቁማ ኢሚቲ” ጊዴሰ።

6

ናዚሬቴ አሳይ ዩሱሳ ኤኪቤቴና
(ማቶ 13:53-58፤ ሉቃ 4:16-30)

1 ሄሳፌ ጉዬ ዩሱሱ ሄፔ ዳንዲዲ ጌዴ ባ ዴሬ ቢዴሰ። ኢዛ ካሊዛይቲካ ኢዛራ ቢዳ። 2 አይሁዳታ ሳምባታይ ጋኪን አይሁዳታ ዋሳ ኮሌ ጌሊዲ ታማርሲሽን ሲዱዳ አሳይ “ሃይሲ አዴዚ ሃይሳ ወርሲ አዋፔ ኤኪዴ? ሃይሲ ኢዛሰ አሜቲዳ ኤራቴላይ አዜ? ቃሴ ሃይቲ ኢዚ ኦላዛ ማላታቲ ዋኒ ኢዛ ኩሼን ሃኒዛ?” ገሼ ማላሌቲዳ። 3 “ሃይሲ አናጃዛ ጊዴኔ? ማራሚ ና ያቆቤንታ ዮሳንታ፥ ዩሁዳንታኔ ሲሞናንታ አሻ ጊዴኔ? ኢዛ ሚቹቲ ኦናራ ሃን ኦ ማታን ዲዛይታ ዴቴኔ?” ገዲ ሄሳፌ ዳንዲዳይሳኒ ኢዛን ኡፋዬቲቤቴና።

4 ዩሱሲካ ኢሰታሰ “ናቤይ ቦንቹቶንታይ ባ ዴሬን ባ ዳቦታ ገደኒኔ ባሶ አሳ አቻን ፃላ” ገዴሰ። *

5 ሄን ጉላ ሃርጋንቻታ ቦላ ኩሼ ዋላ ፓሪገፔ አቲን ሃራ አይኮ ማላታካ አላናሰ ዳንዲይቤና። 6 ኢሰታሰ አማኖይ ባይንዳይሳ ቤዱዲ ማላሌቲዴሰ። ሄሳፌካ ዩሱሲ ጉታን ጉታን ዩዩ ዩዩ ታማርሲዴሰ።

ባና ካሊዛ ታማኔ ናምባታ ዩሱሲ ከቲዴሰ
(ማቶ 10:5-15፤ ሉቃ 9:1-6)

7 ታማኔ ናምባታ ባኮ ጃይጊዲ ናምቡ ናምቡ ሂሰቲ ከቲሽ ቱና አያናታ ቦላ ኢሰታሰ ጎዳቴላ አሚዴሰ። 8 ኢዚ “ኦጌሰ ገዲዛ ጉፌ አቲን ኦጌ ሸንቄ ዋይኮ ኮሮጃ ዋይኮ ሚሽ ኦይኮፍቴ። * 9 ጫማ አላቲ ገደ አቲን ለማና ማይዖ ኦይኮፍቴ። 10 ኢሲ ኮላ አንቲ ጌሊኮ ሄ ካታማፔ አንቲ ኮዛና ጋካናሰ ሄ ኮላን ዲቲ። 11 አዋንካ ኦኒካ አንቲና ሞኪ ኤኮንታ ኢዳኮ ሄፔ ኮዚሽ ሄ ዴሬታ ቦላ ማርካ ገዳና ማላ አንቲ ቶሆ ቦላ ዲዛ ጉዲላ ቆቆፍቴ” ገዲ አዛዚዴሰ። **

* 6:4 ዮሃ 4:44 * 6:8 ሉቃ 10:4-11 * 6:11 ገዲዜ ኦራላ ጫቆ ማፃፋዪኔ 1947 ማርቲላ ላይላን ፃፊቲዳ አማራላ ጌሻ ማፃፋይ ሃይሳፌ ካሊዲ ዲዛ ቆፋ ጉጃቲሰ፤ “አንቲሰ ቱማ ጋይሰ፤ ሄ ካታማይፔ ሶዶሜሲኔ ጋሞራሰ ፐርራሰ ፐርራሰ ሉዓና” ሃይሳ ሃ ቆፋይ ገሪኬ ቃላን ቢርሽቲዳ ማፃፋታን ዴና። * 6:11 ሃዋ 13:51

12 ኢስትካ ሄፔ ኬዚዲ ዳሬይ ማርቴላን ጌላና ማላ ሳባኪዳ።
 13 ዳር ዳይዳንጎታ ኬሲዳ፤ ዳር ሃርጋንቻታ ዛይቴ ቲዬ ቲዬዲ ፓሊዳ። *

ፃማቁዛ የሃኒሳ ሃይቆ
 (ማቶ 14:1-12፤ ሉቃ 9:7-9)

14 ዬሱሳ ሱንሊ ካሴፔ ኤሬቲ ኤሬቲ ቢሺን ካዎ ሄርዶሲ ሄሳ ሲዩደስ። ኢሲ ኢሲ አሳቲ “ሃይሳ ማላ ማላታታ ኦሊዛ ፃማቁዛ የሃኒሲ ሃይቆፔ ዳንዲኒኮ” ጊዳ።

15 ባጋይቲ “ኤላሳ” ጌቴስ፤ ባጋ አሳይ ቃሴ “ካሴ ናቤታፔ ኢሳ ሚሳቲስ” ጌቴስ።

16 ሄርዶሲ የጾዛ ሲይዲ “ታ ኢዛ ቆጼ ቃንዲሲዳ የሃኒሲ ሃይቆፔ ፓዲ ዳንዲዳስ” ጊዳስ። 17 ሄርዶሲ ባ አሻ ፐሊጶሳ ማቾ ሄርዲያደ ኤኪዳ ጌዶን ኦይኬቲዲ ቃሹታና ማላ አዛዚዲ የሃኒሳ ቃሾ ኬሌ ጌልሊዳስ። 18 የሃኒሲ ሄርዶሳ “ኔ ኢሻ ማቾ ኔ ኤኮንታ ማላ ዎጋይ ኔና ዲጌስ” ጊዳ ጊሽ ቃቺዳስ። *

19 ሄርዲያዳ ሄሳ ጊሽ ሆሎታዳ ኢዛ ዎጲሳናስ ኮያዲስ ሺን ዳንዳያቤኩ። 20 ጋሶይካ የሃኒሲ ዪሎኔ ጌሻ አስ ጊዲዳይሳ ሄርዶሲ ኤሪዛ ጊሽ የሃኒሳስ ባቤሲኔ ኢዛ ናጌስ። የሃኒሲ የቲዛይሳ ሄርዶሲ ሲይዲ ሄርጊዛ ጊዲኮካ ኢዚ የቲዛይሳ ዎዝናፔ ሲዩስ።

21 ሄርዶሳ ዬሌታ ጋላስ ቦንቻናስ ጶቃ ሹሜታስ፤ ኦላ ዎታዳራታ አዛዚዛ ዋናታሲኔ ጋሊላ ቢታን ኬሂ ኤሬቲዛ ጌታ አሳታስ ጊቢራ ኬሲዳስ፤ ሄሲካ ሄርዲያዲስ ጊጋ ጋላስ ጊዲዳስ። 22 ሄርዲያዲ ማጫ ናያ ጌላዳ አሳ ሲንጎን ዬላ ዬዲን ሄርዶሳኔ ኢዚ ያይጊዳ አሳ ኢዚ ዬላይ ኡፋይሲዳስ። ካዎይካ ናዮ “ኔ ኮዩዛ ሚሽ ወርሳ ታና ኦይቻ ታ ኔስ ኢማና” ጊዳስ። 23 ቃሴካ ታ ካዎቲላ ባጋ ጊዲዳኮካ ኔ ኦይቸኮ ወርሳ ታ ኔስ ኢማና ጊዲ ኢዚስ ጫቂዳስ።

24 ናያካ ኤሌላ ኬዛዳ ባ አዬዮ “ካዎ አይ ኦይቾ?” ጋዲስ። አዪያካ “ፃማቁዛ የሃኒሳ ሁዔ ቃንፃዳ ኢማ ጋ” ጋዲስ።

25 ናያካ ኤሌላ ኬዛዳ ካዎዛኮ ጌላዳ “ፃማቁዛ የሃኒሳ ሁዔ ኬሬን ዎላዳ ኔ ታስ ኢማና ማላ ኮያይስ” ጋ ኦይቻዲስ።

26 ካዎይ ሄ የጾዛን ዳር ዎጲቲዳስ፤ ጊዳ ኦቲን ያይጌቲዳ ኢማላ ጊሺኔ ጫቂዳ ቃላ ጊሽ ኢዚስ አካይ ጋናስ ኮይቤና።

27 ሄሳ ጊሽ ዎታዳራታፔ ኢሳ ኤሶን ከቲዲ የሃኒሳ ቆጼ ቃንዲዲ

* 6:13 ያቆ 5:14 * 6:18 ሉቃ 3:19-20

ኢዛ ሁዔ ኤኪ ያና ማላ አዛዚዳሰ፤ ኢዚካ ቢዲ ቃሾ ኩላ ገደን የሃኒሳ ቆጂ ቃንዲዳሰ።²⁸ ሁዔዛ ኮሬራ ኤሂዲ ናይሰ ኢሚዳሰ፤ ናያካ ባ አይደሲ ኢማዲሰ።²⁹ የሃኒሳ ካሊዛይቲካ ሄሳ ሲዩዲ ማላ ዩዲ የሃኒሳ አሃ ኤኪ ኤፊዲ ሞጊዳ።

ዩሱሲ ኢቻሹ ሺ ዳሬ ሚዚዳሰ
(ማቶ 14:13-21፤ ሉቃ 9:10-17፤ ዮሃ 6:1-14)

³⁰ ሃሳፌ ጉዬ ሃዋሬቲ ሲሚዲ ዩሱሳ አቻን ዩዩ አጂ ባ ኦሊዲይሳኔ ባ ታማርሲዲይሳ ወርሲ ኢዛሰ የቲዳ።³¹ ዳር አሳይ ዩሺኔ ቢሽ ገዛ ገሽ ቁማ ሚዛ ዎዳይካ ቤቲቤና፤ “እኔ እንቲ ያላ ታናሩ አሲ ባይንዳሶ ቢዲ እኔ ጉሉ ሸምፕ ኤኪቲ” ገዳሰ።³² ሄሳ ገሽ ኢሰቲ ባርካ ዎጎሎን ጌሊዲ ኢሲ አሲ ባይንዳሶ ቢዳ።

³³ ኢሰቲ ቢሽን ዳርቲ ቤዩዲ ቶሆራ ዎሳን ኢሰታፌ ሲንሉ አጂዳ።³⁴ ዩሱሲ ዎጎሎዛፔ ዎጂዛ ዎዳ ዳር ዳሬይ ሸቂ ኡቲዲይሳ ቤዩዳሰ። ሄሚዳይ ባይንዳ ሚሄ ማላ ጊዲዳ ገሽ አሳሰ ቃጂቲዳሰ። ዳር የጎካ ታማርሶ ኦይኪዳሰ። *

³⁵ ሄ ዎዳ ጋይይ ቃሚ ቃሚ ቢዛ ገሽ ኢዛ ካሊዛይቲ ኢዛኮ ሸቂዲ “ሃይሲ ኑ ዲዛሶይ ባዘኮ፣ ጋይይካ ቃሚዳሰ።³⁶ ሃይሳ ሄራን አሲ ዲዛሶ ቢዲ አሳይ ባሰ ሚዛ ካሉ ሻሚ ማና ማላ አሳ ዩዳ” ገዳ።

³⁷ ኢዚ ኢሰታሰ ዛሪዲ “አሳሰ ሚዛ ሚሽ እንቲ አሚቲ” ገዳሰ። ኢሰቲካ ማላሉቲዲ “ኑኒ ቢዲ ናምዑ ጭ ዲናሬራ ካሉ ሻሚዲ ሃይሳ አሳሰ አሚዛኮ ገዳንዳ?” ገዳ። †

³⁸ ኢዚካ ኢሰታሰ “እንቲሰ አይ ላጌ ኡኩሉ ዲዛኮኔ እኔ ቢዲ ጭሉቲ” ገን ኢሰቲ ቢ ጭሊዲ “ኢቻሹ ኡኩሉኔ ናምዑ ሞሌይ ዳሰ” ገዳ።

³⁹ ሃሳፌ ካሊዲ አሳ ጨሊላ ማታ ቦላ ኦይዳን ኦይዳን ኡቲሳና ማላ አዛዚዳሰ።⁴⁰ አሳይካ ጭ ጭኔ ኢቻሹ ታሙ ኢቻሹ ታሙ ገዲዲ ኦይዳን ኡቲዳሰ።⁴¹ ኢዚካ ኢቻሹ ኡኩላኔ ናምዑ ሞሌታ ባ ኩሽን ኦይኪዲ ፑዳ ሳሎ ጭሊዲ አንጂዲኔ ኡኩላ ሚንሉ ሚንሉ አሳሰ ገሻና ማላ ባና ካሊዛይታሰ ኢሚዳሰ፤ ናምዑ ሞሌታካ ኡባ አሳሰ ሻኬሬሉዳሰ።⁴² አሳይ ወሪካ ሚዲ ካሊዳሰ።⁴³ ዩሱሳ ካሊዛይቲ አሳይ ካሊ ሚን አቲዳይሳ ታማኔ

* **6:34** ታይ 27:17፤ 1ካዎ 22:17፤ 2ታር 18:16፤ ሃዚ 34:5፤ ማቶ 9:36
† **6:37** ሄ ዎዳ 200 ዲናሬ ዳማናሰ ኢሲ አሲ 200 ጋላሰ ኦላናሰ ኮሺሰ።

ናምዑ ጥላ ኩሜል ሺሺዳ። 44 ካል ሚዳ አሳፔ አቴማሳይ ፃላ ኢቻሹ ሺ።

ዩሱሲ አባ ቦላራ ሃሙተዳሰ
(ማቶ 14:22-33፤ ዮሃ 6:15-21)

45 ሄራካ ኢዚ አሳ ሞይዚሽ ኢዛ ካሊዛይቲ ሰንፋተዲ ጌዴ ፒንል ቤቴሳይዳ ጌቴቲዘሶ ፒናና ማላ አዛዚዳሰ። 46 ሄፔካ ኢስታ አጋጊዲ ዋሳናሰ ፑዴ ዙማ ቦላ ኬዚዳሰ።

47 ጋዴይ ቃሚን ዋጎሎይ አባ ጊዶን ዲሺን ኢዚ ባርካ ቢታ ቦላ ዳሰ። 48 አባ ቦላ ጫርኮይ ኬሂ ሜተዳ ጊሽ ኢዛ ካሊዛይቲ አባ ሽሪ ሽሪ ዋጎሎ ላጊዛ ሚሻራ ባዳቲሺን ዩሱሲ ቤዩዳሰ። ዋንታ ቦላ ኢስታኮ ዩዳሰ፤ ዩዲኔ ኢስታ አቻራ አዲ ባናላ ሃኒዳሰ። 49 ጊዶ አቲን አዲ ባና ሃኒሺን ኢዛ ቤዩዳ ማላ ሞይተሌ ቤዩዳ ሚሳቲን ወሪካ ዋሲዳ። 50 ወሪካ ኢዛ ቤዩዲ ዲጋሚዳ፤ ኢዚካ ሄራካ ኢስታ ዮቹዲኔ “አይኮይ ባ፤ ታናኮ ዳጋሞፍቴ!” ጊዳሰ። 51 ኢዚካ ዋጎሎን ኢስታኮ ጌሊን ጫርኮይ ጮው ጊዳሰ፤ ኢስቲካ ዳሮ ማላሌቲዳ። 52 ካሴ ኢዚ ኡኬፋን ኦሊዳ ማላታ ቢርሼል ኢስቲ ኤርንታ ጊሽ ኢስታ ዋዝናይ ደጪዳሰ።

53 አባ ፒኒዲ ጌንሴሬዩ ጌቴቲዘሶ ጋኪዳ፤ ዋጎላፔ ዋዲዲ ዋጎሎዛ ሄን ቃቺዲ አጊ ቢዳ። 54 ኢስቲ ዋጎሎፔ ዋዲዳ ማላ አሳይ ዩሱሳ ኤሪዳሰ። 55 ወሪካ ባ ዲዛሶ ዲዛሶ ዋዩሬቲዲ ሃርጋንቻታ ሃላን ቶኪ ቶኪ ኤኪዲ ዩሱሲ ዲዛሶ ኤሂዳ። 56 ኢዚ ጋኪዳ ጉታን ዋይኮ ካታማ ጊዶን ዋይኮ ዳሬ ጊዶን ጊዶን ሃርጋንቻቲ ኢዚ አዲሺን ኢዛ ዋሲዲኔ ኢዛ ማይዎ ቦቹዲ ፓፃና ማላ ሺሺ ሺሺ ዲቡሻይ ዲዛሶን ዋሊዳ። ኢዚ አዲ ቢሺን ኢዛ ማይዎ ቦቹዳይቲ ወሪ ፓዲዳ።

7

ካሴ አይሁዳ አዋታ ዋጋ
(ማቶ 15:1-9)

1 ሃሳፌ ጉዬ ፋርሳዌቲኔ ዩሩሳላሜፔ ዩዳ ኢሲ ኢሲ ያፌቲ ዩሱሳ ላንቄን ዩዩ አዲዳ። 2 ዩሱሳ ካሊዛይታፔ ባጋይቲ ሜጩቶንታ ቂታ ኩሼራ ካል ሚሺን ቤዩዳ።

3 ፋርሳዌቲኔ ካሴ ጨማ አይሁዳ አሳቲ ካሴ ዳሬ ዋጋ ናጋናሰ ኩሼ ሎዔል ሜጩቶንታ ካል ሚ ኤሬቴና። 4 ጊያ ቢ ሲሚኮካ

ቦላ ሜጩቲ ገዮንታ ዲሼ ካል ሚ ኤሬቲና። ሄሳዳካ ዋንጫካ፣ ኦቶካ፣ ኬሬካ፣ ኢቸዛ ሂሴካ ሜቻ ማላታ ሃራ ዋጋታካ ናጌቴሰ።
5 ፋርሳዌቲኔ ፃፊቲ ዬሱሳ “ኔና ካሊዛይቲ ካሴ ኣዋታ ዋጋ ማላ ዲሰ ኣጊዲ ኣዛሰ ኩሼ ሜጩቶንታ ካል ሚዞ?” ጊዲ ኦይቸዳ።

6 ኢዚካ ኢሰታሰ “ኢሳያሲ ቆጶፔ ቆሞን ሃኒዛ ኢንቴ ገሽ ሃይሲ ዳሬይ ባ ሜቴርሻን ፃላላ ታና ቦንቸሰ፤ ዋዘናይ ጊዲኮ ታፔ ሃኪዳሰ።

7 ታሰ ሚላ ሃዳ ጎይኔቲሰ፤ ኢሰታ ተሚርቲይካ ኣሲ ዋሊዳ ዋጋ ፃላ፣ ጊዲ ዮቲዳይሰ ቱማ” ጊዳሰ።

8 ያሳ ዋጋ ኣጊዲ ኣሲ ዋሊዳ ዋጋ ናጌቴሰ። 9 ቃሴካ “ኢንቴ ዋጋሰ ጊዲ ያሳ ዋጋ ኢንቴ ኣጋጊዛ ጨንጫቴላ ኦጌይ ኢንቴሰ ዳሰ። 10 ኣይሰ ገኮ ሙሴይ “ኔ ኣዮኔ ኔ ኣዋ ቦንቻ፤ ባ ኣዮኔ ባ ኣዋ ጫዩዛዳይ ሙሉካ ሃይቆ ጊዳሰ። * 11 ጊደ ኣቲን ኢንቴ ቃሴ “ኢሲ ኣሲ ባ ኣዋ ዋይኮ ባ ኣዮ ኢንቴ ታፔ ዳማናሰ ኮሺዛ ማዶ ታ ያሳሰ ኢማዲሰ፣ ገኮ፤ 12 ኢንቴ ቃሴ ሃይሳዳይ ባ ኣዋሰካ ባ ኣይይሲ ሃራ ኣይኮካ ኦላና ማላ ኮይኬታ። 13 ሄሳ ገሽ ኢንቴ ዋጋ ናጋና ጊዲ ያሳ ቃላ ላሜታ። ሄይታንታ ሚሳቲዛ ዳርታ ኦሌታ።” ጊዳሰ።

14 ቃሴካ ዬሱሲ ኣሳ ባኮ ፃይጊዲ “ወሪካ ታ ጊዛ ሰዩቲኔ ዋዘናን ዋሊቴ። 15 ካሬፔ ኡሎ ጊደ ጌሊዲ ኣሰ ቱኒሲዛ ኢሲ ሚሽካ ዳና። ሃራፔካ ኣሴ ቱኒሲዛይ ኬላ ኣዋፔ ጌዴ ካሬ ኬዚዛ ሚሻ። 16 ሲዩዛ ሃይሊ ዲዛይ ሲዮ!” ጊዳሰ። *

17 ኢዚ ኣሳ ካሬን ኣጊዲ ኬፍ ጌሊን ኢዛ ካሊዛይቲ ኢዚ ዮቲዳ ለሚሶዛ ቢርሹል ዬሱሳ ኦይቸዳ። 18 ኢዚካ ኢሰታ “ኢንቴሰካ ዮጋይ ጌሌኔ? ካሬፔ ጌሊዲ ኣሴ ቱኒሲዛ ሚሽ ኣዚካ ዳና። 19 ካሬፔ ጌሊዛይ ጌዴ ዋዘናን ጊደንታ፤ ዳጌ ቃንሳ ጊደ ጌሌሰ ቃሴ ሄፔ ኢዛዳ ኣሳቴላፊ ጌዴ ካሬ ኬዜሰ።” ዬሱሲ ሄሳ ጊዳይ ኣሲ ሚዛ ካሊ ወሪካ ጌሽ ጊዲዳይሳ ቆንጨሳናሳ።

20 ካሌሊዲካ “ኣሳፔ ኬዚዛዚ ኣሴ ቱኒሴሰ። 21 ኣሳ ዋዘና ጊደፊ ኬዚዛይ ኢታ ቆፋታ፣ ላይማ ኣሞኔ ካይሶቴላ፣ ኣሴ ዋጶ፣ ላይማቴላ፣ 22 ዪቄቴላ፣ ኢታቴላ፣ ባሌላ፣ ላይማ ካሰ፣ ቃናቴቴላ፣ ኣሳ ሱገል ሞር፣ ኦቶሬቴሊኔ ኣዛላ። 23 ሃይቲ ኢታ ሃኖቲ ወሪ ኣሳፔ ኬዜቴሰኔ ኣሴ ቱኒሴቴሰ” ጊዳሰ።

* 7:10 ኬሳ 20:12፤ 21:17፤ ዛሬ 5:16፤ ለዌ 20:9 * 7:16 ኢሲ ኢሲ ጌሻ ማፃፋቲ ፓይዶ 16 ቦላ ዲዛ ቆፋ ጉጅቴሰ።

ኢሲ ማጫሳይ አማኛ
(ማቶ 15:21-28)

24 ዩሱሲ ሃፔ ኬዚዲ ዓርሴ ጌቴተዛ ዴሬ ቢዴስ። ሄን ኢሳዴ ኬሌ ጌሊዲ ኢዚ ሄን ዲዛይሳ አሲ ኤርንታ ማላ ኮዪዴስ። ጌዶ ኣትን ኢዚ ሄን ኢዛ ዲሳይ ቆቴታናሰ ዲንዳዬተቤና።

25 ሄራካ ኢሲ ቱና ኣያናይ ኦይኪዳ ጉላ ና ዲዛሪ ኣያ ዩሱሲ ሄን ዲዛይሳ ሲያዳ ኢዛኮ ያዳ ኢዛ ቶሆ ቦላ ኩንዳዲስ።

26 ማጫሳያ ኣይሁዳ ጊዶንታ ጊሪኬ ቃላ ሃሳዪዛ ማጫሳሺን ኢዛ ዩሌተዳሶይ ሲርፊንቄ ጌቴቱስ። ኢዛካ ዩሱሲ ናይፔ ቱና ኣያና ኬሳና ማላ ዋሳዲስ። 27 ዩሱሲ ዛሪዲ ኢዚሰ “ናይታ ቀማ ኤኪ ካናሰ ዩጋናሰ ቤሶንታ ጊሽ ኮይሮ ናይቲ ሚ ካሌቶ” ጌዴስ።

28 ኢዛካ ዛራዳ “ኤ ጎዶ! ካናቲካ ማዳ ማታን ዴዒዲ ናይታ ኩሼፔ ጋዴን ዋዲዳይሳ ሜቲሲኮ” ጋዴስ።

29 ኢዚካ “ሂሰቲኮ ኔኒ ሄሳ ጊዳ ጊሽ ባ! ዳይዳንላይ ኔ ናይፔ ኬዚዴስ” ጌዴስ። 30 ኢዛ ሲማዳ ሶ ቢሺን ናያ ዳይዳንላይ ዩዲን ፓዓዳ ሂፃን ኢቸዳሮ ዴማዲስ።

ዩሱሲ ኢሲ ዲና ዲዴኔ ሃይላ ቱሌ አሰ ፓሲዴስ

31 ሄሳፊ ዩሱሲ ዓርሴ ቢታፊ ዴንዲዲ ሲዶና ጊዛሶራ ኣዲ ታሙ ካታማ ጊዛሶራ ካንሲዲ ጌዴ ጋሊላ ኣባኮ ጋኪዴስ።

32 ኣሳይ ኢሲ ሃይላ ቱሌኔ ኣይፊ ቆቄ አሲ ኢዛኮ ሄ ኤኪ ዩዲ ዩሱሲ ኢዛ ቦላ ባ ኩሼ ዋላና ማላ ዋሲዳ።

33 ዩሱሲካ ኢዛ ኣሳፔ ሻኪ ኤኪ ቢዲ ባ ኩሼ ቢራዴታ ኣዴዛ ሃይላን ጌልሲዴስ፤ ቃሴካ ጨቶ ጨቲዲ ኣዴዛ ኢንፃርሳ ቦቸዴስ።

34 ፑዴ ሳሎ ዪሊዲኔ ቶኪ ሼምፒዲ “ኤፊታ” ጌዴስ። ሄሲካ “ፖጌታ” ጉሳ። 35 ሄራካ ኣዴዛ ሃይላቲ ፖጌቲዳ፤ ኢንፃርሳይካ ቢርሼቲን ጌሺ ሃሳዪዴስ።

36 ዩሱሲ ሃይሳ ቤዩዳይቲ ኦናሰካ ዮቶንታ ማላ ኣዛዚዴስ፤ ጌዶ ኣትን ኣሳይ ኢዚ ኣዛዚዳይሳፊ ቦላሪ ኬሂ ጉጂዲ ዮቲዳ። 37 ዴሪዚካ ዋጋፔ ኣሲ ማላሌቲዲ “ኢዚ ኦሲዳይሲ ወሪ ሎዖ፤ ቱሌቲ ሲያና ማላ፣ ዲና ዲዴቲ ሃሳያና ማላ ኦሲዴስ” ጌዴ።

8

ዩሱሲ ኦይዲ ሺ አሰ ሚዚዴስ
(ማቶ 15:32-39)

1 ህ ዎዴ ቃሴ ዳሮ ኣሲ ሸቁደስ። ሸቁዳ ኣሳሰ ሚዛ ካሌ ባይንዳ ጊሽ ዩሱሲ ባና ካሊዛይታ ዪይጊዲ። 2 “ሃይቲ ኣሳቲ ታናራ ሄቹ ጋላስ ጋካናስ ጋምዒዳ ጊሽኔ ቃሴካ ኢስታስ ሚዛ ካሌ ባይንዳ ጊሽ ታና ሚቹቲስ። 3 ኢስታፊ ኢሲ ኢሲ ኣሳቲ ሃሆፔ ዪዳ ጊሽ ሃይሳ ጋፋራ ታ ኢስታ ሶ ዩዲኮ ዳቡሪዲ ኦጌ ቦላ ኩንዳና” ጊዳስ።

4 ኢዛ ካሊዛይቲካ ዛሪዲ “ሃይሳ ባዞን ሃይሳ ማላ ዴሬ ሚዛና ቁማ ኣዎፔ ዴማኔ?” ጊዳ።

5 ኢዚካ ኢስታ “ኢንቴኮን ኣፑን ኡኬሌ ዲዜ?” ጊ ኦይቹደስ። ኢስቲካ “ላፑን ኡኬሌ ዴስ” ጊዳ።

6 ኢዚካ ኣሳይ ጋዴን ኡታና ማላ ኣዛዚደስ፤ ላፑን ኡኬላ ባ ኩሽን ኦይኪ ጋላቲዲኔ ማንሉዲ ኣሳሰ ጊሽቻና ማላ ባና ካሊዛይታስ ኢሚን ኢስቲካ ዴሬዛስ ጊሽዲ። 7 ቃሴካ ሄን ዲዛ ቂሪ ጉላ ሞሌታ ጊሽ ያሳ ጋላቲዲ ጉላ ሞሌታ ኣሳሰ ጊሽቻና ማላ ባና ካሊዛይታ ኣዛዚደስ። 8 ዴሬይካ ሚዲ ካሊዲደስ። ሄሳፊካ ኢዛ ካሊዛይቲ ማዳፊ ፓላሂዳ ካላ ላፑን ፒላ ኩሚላ ዴንሉዲ።

9-10 ሄሳ ሚዳ ኣሳይ ኦይዲ ሸ ጊዳና። ህ ኣሳ ሞይዚዲ ባና ካሊዛይታራ ዎሳሎን ጌሊዲ ጌዴ ዳልማኦታ ጌቲቲዛሶ ቢደስ።

11 ፋርሳዌቲ ዩዲ ዩሱሳራ ፓላሚቲላ ኦይኪዲ። ኢዛ ፓጫናስ ኮዩዲ ባና ሳሎፔ ማላታ ቤሳና ማላ ኦይቹዳ። * 12 ኢዚካ ቶኪ ሸምፒዲ “ሃይሲ ዩሌታዚ ኣዛስ ማላታ ኮዩዜ? ታ ኢንቴስ ቱማ ጋይስ፤ ሃይሳ ዩሌታስ ኢሲ ማላታይካ ኢሚቴና” ጊደስ።

* 13 ኢስታ ሄን ኣጊዲኔ ዎሳሎን ጌሊዲ ህ ፒንላ ፒኒደስ።

ፋርሳዌታ ኢርሾኔ ሄርደሳ ኢርሾ
(ማቶ 16:5-12)

14 ኢዛ ካሊዛይቲ ካላ ኦይኮንታ ባሌቲዳ ጊሽ ኢሲ ኡኬላ ኣቲን ዎሳሎ ጊደን ሃራ ኣይ ካሊካ ዴና። 15 ዩሱሲ ኢስታ “ፋርሳዌታ ኢርሾፊኔ ሄርደሳ ኢርሾፊ ናጌቲቲ” ጊዲ ኣዛዚደስ። *

16 ኢስቲ ቃሴ ባ ጊደን ኢሶይ ኢሳራ “ኢዚ ኦና ሃይሳ ጊዛይ ኦስ ካላ ባይንዳ ጊሻሳ” ጊ ዮቲቲዳ።

17 ቃሴ ዩሱሲ ኢስታ ቆፋ ኤሪዲ “ኦስ ካሌ ባይንዳ ጊሽ ጋሳ ጊዲ ኢንቴ ጊደን ኣዛስ ሃሳዬቲቲ? ሃዒካ ዩሺ ቆፔኬቲ?”

* 8:11 ማቶ 12:38፤ ሉቃ 11:16 * 8:12 ማቶ 12:39፤ ሉቃ 11:29
* 8:15 ሉቃ 12:1

ዎዘናንካ ዎሌኬት? ዎይኮ ኢንቴ ዎዘናይ ሹቻቲዳ? 18 ኢንቴሰ አይፌይ ዳሰ ሺን ዓሌኬት? ሃይሌ ዳሰ ሺን ሲዬኬት? አኬኬኬት? * 19 ኢቻሹ ኡኬላ ኢቻሹ ሺ አሳሰ ታ ሜንላ ኢሚን አቸን ጥላ ኩሜላ ካላ ዳንሳይት?” ጊዳስ።

ኢሰቲካ ዛሪዲ “ታማኔ ናምዑ” ጊዳ። 20 ኢዚካ “ላቸን ኡኬላ ኦይዲ ሺ አሳሰ ታ ሜንላ ኢሚን አቸን ጥላ ኩሜላ ካላ ዳንሳይት?” ጊ ኦይቸን ኢሰቲካ “ላቸን” ጊዳ።

21 ኢዚካ ኢሰታ “ሂሰቲን ሃዒ ጋካናሰ ዩሺ ቆፒቤኬታካ!” ጊዳስ።

ዩሱሲ ቤተሳይዳን ኢሲ ቆቄ አሲ ፓሌዳስ

22 ሂሳፌ ጌዴ ቤተሳይዳ ጌቴቲዛሶ ቢዳ። ጉላ አሳቲካ ኢሲ አይፌ ቆቄ አሲ ዩሱሳኮ ኤሂዲ ዩሱሲ ኢዛ ቦቻና ማላ ዎሲዳ።

23 ኢዚካ ሄ ቆቄዛ ኩሹ ኦይኪ ጎቹዲ አሲ ዲዛሶፔ ጌዴ ካሬ ኬሲ አዳዛ አይፌን ጨቲዲኔ ባ ኩሹ ኢዛ ቦላ ዎሊዲ “ሃዒ ኔሰ አዚ ቤተዜ?” ጊ ኦይቸዳስ።

24 ኢዚካ ቶቄ ጊ ያሊዲ “አሳይ ሚላ ሚሳቲዲ ቃዳቴሹ ቤቴሰ” ጊዳስ።

25 ቃሴካ ዩሱሲ ባ ኩሹታ ኢዛ አይፌታ ቦላ ዎሊዳሰ፤ ሄራካ ኢዛ አይፌቲ ያሊዳ፤ ፖጋይካ ኢዛሰ ሰሚን ወርሲካ ጌሺ ያሊዳስ። 26 ቃሴ “ሃ ጉታታ ጊዶ ጌሎፓኔ ኦናሰካ ዮቶፓ” ጊዲ ኢዛ ጌዴ ኢዛሶ ዩዲዳስ። *

ዩሱሲ ያሳፕ ከቴቲዳዳ ጊዲዳይሳ ጴፀርሲ ማርካቲዳስ (ማቶ 16:13-20፤ ሉቃ 9:18-21)

27 ዩሱሲ ባና ካሊዛይታራ ቁሳሪያ ፒሊጲሲዮሴ ጌቴቲዛ ዳሬ አቻን ዲዛ ጉታታ ቢዳስ፤ ኢሰቲ ኦጌ ቦላ ዲሺን ባና ካሊዛይታ “ታና አሳይ ኦና ጊዜ?” ጊዲ ኦይቸዳስ።

28 ኢሰቲካ ዛሪዲ ኔና “ፃማቁዛ ዮሃኒሳ ጊዛይቲካ ዳቴሰ፣ ባጋቲ ቃሴ ኤላሳ ጌቴሰ፣ ሃራቲ ቃሰ ናቤታፔ ኢሳዳ ጌቴሰ” ጊዲ ዮቲዳ። *

29 ካሌሊዲካ ኢንቴቶ ታና ኦና ጌቲ? ጊዲ ኦይቸዳስ። ጴፀርሲ “ኔኒ ኪርሰቶሳ” ጊዳስ።

* **8:18** ኤር 5:21፤ ሂዚ 12:2፤ ማር 4:12 * **8:26** ጊዒዜ ጫቆ ኦራሳ ማፃፋዚ 1947 ማርቴላ ላይላን ፃፊቲዳ አማራሶ ጌሻ ማፃፋዚኔ ኢሲ ኢሲ ቤኒ ጊሪኬ ቃላን ፃፊቲዳ ጌሻ ማፃፋቲ ሃይሳፌ ካሊዛ ቆፋይ ጉጃቲዳስ። ሂሰቲኮ ሃይሳ ኦናሰካ ዮቶፓ።

* **8:28** ማር 6:14-15፤ ሉቃ 9:7-8

30 ዩሱሲካ ባ ጊሽ ኦናሰካ ኢስቲ ዮቶንታ ማላ ሚንሌ ዮቲዴሰ።

ዩሱሲ ባ ሃይቃናይሳ ካሴቲዲ ዮቲዴሰ
(ማቶ 16:21-28፤ ሉቃ 9:22-27)

31 ሄሳፌ ዩሱሲ ባና ካሊዛይታ፡ “አሳ ናይ ዳሮ ዋዬ ቤያናይሳኔ ዴሬ ጨማታን፡ ቁሴታ ሃላቃኒኔ ፃፊታን ካዲታናይሳ አሳ ኩሼን ሃይቃናይሳ፡ ሃይቆፔ ሄቸንሉ ጋላሰ ዴንዳናሰ ቤሴሰ” ጊዲ ታማርሶ ኦይኪዴሰ። 32 ኢዚካ ሄሳ ኢስታሰ ቆንጨሲ ዮቲዴሰ፡ ጴፀርሲካ ኢዛ ዲማ ሻኪ ኤፊዲ “ሄሳሉ ጎፕ!” ጊዲ ሃንቂዴሰ።

33 ዩሱሲ ቃሴ ባና ካሊዛይታ ዩሺ ያሊሼ ጴፀርሳ “ሃይሶ ፃላዔ ኔ ታፔ ጌዴ ጉዬ ባ! ኔኒ አሳዛፔ ኣቲን ያሳዝ ቆፓካ!” ጊዲ ሃንቂዴሰ።

34 ሄሳፌ ጉዬ አሳ ባና ካሊዛይታራ ኢሲፌ ባኮ ያይጊዲ “ታና ካላናሰ ደሲዛዴይ ዲኮ ባና ካዶ፤ ባ ማሰቃሌ ቶኪዲ ታና ካሎ። * 35 ባ ሼምፖ አሻና ደሲዛዴይ ዳይሳና ሺን ታ ጊሺኔ ታ ሚሺራቾ ቃላ ጊሽ ባ ሼምፖ ዳይሲዛዴይ ወሪካ አሻና። * 36 አሲ አላሜ ኩሜላ ሃሪኮኔ ባ ሼምፖፌ ዳይሲኮ ኢዛ አይ ጎሳኔ? 37 ዋይኮ አሲ ባ ሼምፖ ጊሽ ላሜ ኤካናይ አዚ ዲዜ?”

38 “ሃይሳ ላይማኔ ናጋራንቻ ዩሌታ ጊዶን ዲሼ ታናኒኔ ታ ቃላን ዩላቲዛ አሲ ወሪ ታ አሳ ናይ ታ አዋ ቦንቾራኔ ጌሻ ኪታንቻታራ ዩዛ ዋዴ ኢዛን ዩላታና” ጊዴሰ።

9

1 ካሌሌዲካ ዩሱሲ “ታ ኢንቴሰ ቱማ ጋይሰ፤ ሃይሳን ኤቂዳ አሳፔ ያሳ ካዋቲሌ ዋልቃራ ዩሺን ቤያና ጋካናሰ ሃይቆንታ ጋምዓና ኢሲ ኢሲ አሳቲ ዳቲሰ” ጊዴሰ።

ዩሱሳ ሜዳይ ላሜቲዴሰ

2 ኡሱፑን ጋላሳፌ ጉዬ ዩሱሲ ጴፀርሳ ያቆቤኔ ዮሃኒሳ ባናራ ካሌሌ ኤኪዲ ኢሲ ጊታ ዙማ ቦላ ኬዚዴሰ። ኢስቲ ባርካ ዲሺን ኢስታ ሲንፋን ኢዛ ሜዳይ ላሜቲ ዋዲዴሰ። * 3 ኢዚ ማይዲዳ ማይዶይ ቢታ ቦላ ኦኒካ ማይዶ ሜጨዲ ሄሳ ማላ

* 8:34 ማቶ 10:38፤ ሉቃ 14:27 * 8:35 ማቶ 10:39፤ ሉቃ 17:33፤ ዮሃ 12:25 * 9:2 2ጴፀ 1:17-18

ቦላናስ ዳንዳዮንታ ቦላ ቦቲዳስ። 4 ሄ ዋዴ ኤላሲኔ ሙሴይ ዩሱሳራ ሃሳዬቲሼ ኢስታስ ቤቲዳ።

5 ጳጳርሲ ዩሱሳ “ኣስታማሬ! ኑኒ ሃን ሃይሳን ዲዛኮ ኑስ ሎዎ፤ ኔስ ኢሲ ዳሴ፣ ሙሴስ ኢሲ ዳሴ፣ ቃሴ ኤላሳስ ኢሲ ዳሴ፣ ሄሹ ዳሴታ ኑ ኦሊኮቲ?” ገዴስ። 6 ዳሮ ባቢዳ ጊሽ ጳጳርሲ ባ ጊዛይሳ ኤሪዲ ጊቤና።

7 ሄራካ ሻራይ ኢስታ ካሚን ሻራ ገደራ “ሃይሲ ታ ደሲዛ ታ ናዛኮ! ኢዚ ጊዛ ሲዩቲ” ጊዛ ቃላ ገሪሲ ዩዴስ። *

8 ሄራካ ኢስቲ ዩሺ ዌሊን ዩሱሳፔ ኣቲን ኦኒካ ሃራ ኣስ ኢስታራ ዴና።

9 ኢስቲ ዙማ ቦላፌ ዲጌ ዋጲሺን ኣሳ ናይ ሃይቆፔ ዴንዳና ጋካናስ ሃይሳ ኢስቲ ቤዩዳይሳ ኦናስካ ዮቶንታ ማላ ኣዛዚዴስ።

10 ኢስቲካ ባስ ዮቲዳ ቃላ ባ ዋዝናን ኦይኪዳ ሺን “ሃይቆፔ ዴንደ ጉሲ ኣይ ጉሳኮኔ” ገዲ ባ ገደን ሃሳዬቲዳ

11 ቃሴ ኢስቲ ሙሴ ዋጋ ታማርሲዛይቲ “ካሴቲዲ ኤላሲ ያና ኮሺስ ኣዛስ ጊዞ?” ገዲ ኢዛ ኦይቲዳ። *

12 ዩሱሲ ኢስታስ “ቱሙካ ኤላሲ ካሴቲ ዩዲ ወርሲካ ጊሊሳና። ሂስቲንካ ኣሳ ናይ ዳሮ ዋዬ ኤካናሲኔ ካጴታናስ ቤሴስ ጌቲቲ ፃፌቲዳይሲ ኢንቴስ ኣይ ሚሳቲዜ? 13 ገደ ኣቲን ታ ኢንቴስ ጊዛይ ኤላሲ ገዲኮ ዩዴስ ሺን ኣሳይካ ኢዛ ጊሽ ፃፌቲዳ ማላ ባና ኮሺዳ ማላ ኢዛ ቦላ ኦሊዴስ” ገዴስ።

ዩሱሲ ኢታ ኣያናይ ኦይኪዳ ኢሲ ና ፓሊዴስ
(ማቶ 17:14-20፤ ሉቃ 9:37-43)

14 ዲጌ ገደን ኣቲዳ ዩሱሳ ካሊዛይታኮ ኢስቲ ሲሚ ዩሺን ዳሮ ኣሳይ ኢስታ ገደሊን ሙሴ ዋጋ ታማርሲዛይቲ ኢስታራ ፓላሚቲዛይሳ ቤዩዳ። 15 ዴሬይ ኢዛ ዴሚዳ ማላ ማላሊቲዲ ሳሮካናስ ኢዛኮ ዋፂዴስ።

16 ኢዚካ ኢስታ “ኢንቴ ኢስታራ ኣዛ ጊሽ ፓላሚቲቲ?” ገዲ ኦይቲዳስ።

17 ኣሳ ገደፌ ኢሳዴይ “ኣስታማሬ! ቱና ኣያናይ ኢዛን ጌሊን ዱና ዲዲዳ ታ ና ዳይሳ ታ ኔኮ ኤካ ያዲስ። 18 ኣያናዚ ዴንዲዛ ዋዴ ቦላፌ ዩጌስ፤ ዱናራ ጎፖንቶ ኬሲ ኬሲ ዩጌስ፤ ኣቻካ ጋርጨስ፤ ኣሳቲሳካ ዞዲሴስ። ቱና ኣያና ኬሴቶ ጋዳ ኔና ካሊዛይታ ታ ኦይቲን ኢስቲካ ዳንዳዩቤቲና” ገዴስ።

* 9:7 ማቶ 3:17፤ ማር 1:11፤ ሉቃ 3:22 * 9:11 ሚሊ 4:5፤ ማቶ 11:14

19 ዩሱሱስ ኢስታስ ዛሪዲ “ኢንቴኖ አማኖንታ ዩሌታቶ፥ አይዴ ጋካናስ ታ ኢንቴናራ ዳኔ? ቃሴ አይዴ ጋካናስ ታ ኢንቴና ዳንዳያኔ? እኔ ናዛ ሃ ኤሂቲ” ጊዴስ። 20 አሳይካ ናዛ ኢዛኮ ኤሂዴስ፥ ቱና አያናይ ዩሱሳ ቤዪዳ ማላ ናዛ ሄራካ ጋዴን ፔንዴርሲዲ ኮኮርሲዲኔ ዲናራ ገፖንቶ ጮፑ ሂስቲዴስ።

21 ዩሱሱ ናዛ አዋ “ሃይሲ ሃርጌይ ኢዛ አዪዴሳፔ ኦይኪዴ?” ጊዴስ። ናዛ አዋይካ “ናቴላፌ ደሚዲ” ጊዴስ። 22 “ኢዛ ዋቋናስ ኮይዲ ዳር ዋዴ ታማንካ ሃላንካ ዩጌስ። ኔስ ዳንዳዬቲኮ ኑስ ሚሼታኔ ኑና ማዳ” ጊዴስ።

23 ዩሱሱ ቃሴ “ኔስ ዳንዳዬቲኮ ጋይ? አማኒዛዴስ ዉሪካ ዳንዳዬቲስ” ጊዴስ።

24 ናዛ አዋይ ሄራካ “ታ አማናይስ ሺን ታ አማናይ ላፋ፥ ታና ማዳሪኪ?” ጊዲ ዋሲዴስ።

25 አሳይ ዋጫሚሽ ቡሬቲ ኤኪዲ ኢዛኮ ዪዛይሳ ዩሱሱ ቤዪዲ “ሃይሶ ቱሌኔ ዲዴ አያናዙ! ሃይሳ ናዛፔ ኬዛ፥ ኔ ቃሴ ሲማዳ ጌሎንታ ማላ ታ ኔና አዛዛይስ” ጊዲ ቱና አያና ሴሪዴስ።

26 ቱና አያናዚካ ኬሂ ዋሲዴስ፤ ናዚካ ኬሂ ቃኬቲዳፔ ጉዬ ናዛፔ ኬዚዴስ። ዳርቲ ሃይቂዴስ ጋና ጋካናስ ናዚ አሃ ሚሳቲዴስ።

27 ጊዴ ኣቲን ዩሱሱ ናዛ ኩሼ ኦይኪ ዴንሊዴስ። ናዚካ ዴንዲ ኤቂዴስ።

28 ዩሱሱ ሶ ጌሊዳፔ ጉዬ ኢዛ ካሊዛይቲ “ኑ ኢዛፔ ቱና አያና ኬሳናስ አዛሰ ዳንዳዪቤይኮኒ?” ጊዲ ኢዛ ኦይቺዳ።

29 ኢዚካ ኢስታስ “ሃይሳ ማላይ ኬዛና ዳንዳዪዛይ ዋሳኒኔ ፆማን ፃላ” ጊዴስ።

**ዩሱሱ ባ ሃይቆ ጊሺኔ ባ ዴንዶ ጊሽ ቃሴካ ዮቲዴስ
(ማቶ 17:22-23፤ ሉቃ 9:43-45)**

30 ሄፔ ዴንዲ ጋሊላ ባጋራ አቋ ቢዳ። ዩሱሱ ባ ዲዛሶ ኦኒካ ኤራና ማላ ኮይቤና። 31 ጋሶይካ ዩሱሱ ባና ካሊዛይታስ “አሳ ናይ አሳ ኩሼን አቋ ኢሚታና ኢስቲካ ኢዛ ዋቋና፥ ሄቫንሶ ጋላሳፌ ጉዬ ኢዚ ዴንዳና” ጊዲ ኢስታ ታማርሲዛ ጊሻሳ። 32 ጊዴ ኣቲን ኢዚ ጊዛይሲ ኢስታስ ጌሊቤና፤ ኢዛ ኦይቻናሰካ ባቢዳ።

**ኡባፌ አቋዛይ ኦኔ?
(ማቶ 18:1-5፤ ሉቃ 9:46-48)**

33 ሄሳፌ ጉዬ ቂፊርናሆሚ ቢዳ። ኢዚ ኬፌ ጌሊዲ “ኢንቴ ዪሼ ኦጌ ቦላ አዛ ጊሽ ፓላሜቲዴቲ?” ጊ ኦይቺዴስ።

34 ኢስቲ ቃስ ኦጌ ቦላ “ኑ ጊደን ኑፔ ኡባፌ ኣጲዛይ ኦኔ?” ጊዲ ፓላማቲዳ ጊሽ ወሪካ ጮፀ ጊዳ። *

35 ኢዚ ኡቲዳፔ ጉዬ ታማኔ ናምባታ ያይጊዲ “ኮይሮ ጊዳና ኮዩዛዳይ ኡባፌ ወርሴሊኔ ኡባታስ ኣሸካራ ጊደ” ጊዳስ። *

36 ቁ ጉላ ና ኤሂዲ ኢስታ ጊደን ኤሲዳስ። ኢዲሚዲኔ

37 “ሃይታ ጉላ ናይታፔ ኢሳዴ ታ ሱንላን ሞኪ ኤኪዛዳይ ታናካ ሞኪ ኤኬስ። ታና ሞኪ ኤኪዛዳይ ወሪ ታና ፃላላ ጊደንታ ታና ከቲዳይሳካ ሞኪ ኤኬስ” ጊዳስ። *

ኑና ኢደንታይ ወሪ ኑ ባጋ
(ሉቃ 9:49-50)

38 ዮሃንሲካ “ኣስታማሬ! ኢሳዳይ ኔ ሱንላን ዳይዳንሊ ኬሲሺን ኑ ቤይዶስ። ኢዚ ኑና ካሎንታ ጊሽ ኬሶንታ ማላ ዲጊደስ” ጊዳስ።

39 ዬሱሲ ቃሴ “ዲጎፍቴ፤ ኦኒካ ታ ሱንላን ማላታ ኦሊዲ ኤሶቲዲ ታ ቦላ ኢታ ሃሳያናስ ዳንዳዬና። 40 ኑናራ ኤቁቶንታይ ወሪ ኑናራ ዳስ። * 41 ታ ኢንቴስ ቱሙ ጋይስ፤ ኢንቴ ቲዬቲዳ ከርሰቶሳስ ጊዲዳ ጊሽ ታ ሱንላን ኢሲ ሞንጫ ሃላ ኢንቴና ኡሺዳዳይ ወሪ ባ ኦሶይስ ሞጋ ጳዬና። *

ኣሳስ ጳ.ጴ ጊዳናፔ ናጌቴላ
(ማቶ 18:6-9፤ ሉቃ 17:1-2)

42 “ሃይታ ታና ኣማኒዛ ሃ ጉላታፔ ኢሳዳስ ጳ.ጴ ጊዲዛይ ወሪ ዳዖ ሞፃ ሹቺ ኢዛ ቆጴን ቃሹቲን ዲጌ ኣባ ጊደ ኦሌቲዳኮ ኢዛስ ሎዖ ጊዳና። 43 ሃሳ ጊሽ ኔ ኩሼይ ኔና ባሌሊኮ ኔፔ ቃንፃ ዬጋ፤ ናምቡ ኩሼራ ዳዳ ጌዴ ጋናሜ ታማን ኔ ባናይሳፌ ኩሼ ዳዳ ጊዳዳ ጌዴ ዳዖን ጌሎይ ኔስ ሎዖ ጊዳና። * 44 ጋናሜን ጉፁኔይ ሃይቁና፣ ታማይኔ ቶዔና። * 45 ኔና ኔ ቶሆይ ባሌሊኮ ኔፔ ቃንፃ ዲጋ፤ ናምቡ ቶሆራ ዳዳ ጌዴ ጋናሜ ታማን ዬጌታናፔ ኔ ሞቤ ጊዳዳ ጌዴ ዳዖሶ ጌሎይ ኔስ ሎዖ። 46 ጋናሜን ጉፁኔይ ሃይቁና፣

* 9:34 ሉቃ 22:24 * 9:35 ማቶ 20:26-27፤ 23:11፤ ማር 10:43-44፤ ሉቃ 22:26 * 9:37 ማቶ 10:40፤ ሉቃ 10:16፤ ዮሃ 13:20 * 9:40 ማቶ 12:30፤ ሉቃ 11:23 * 9:41 ማቶ 10:42 * 9:43 ማቶ 5:30 * 9:44 ኢሲ ኢሲ ገሻ ማፃፋቲ ፓይዶ 44 ቦላ ዲዛ ቆፋ ጉጁቴስ፤ ቆፋዚካ ፓይዶ 48 ቦላ ዲዛይሳ ሚሳቴስ።

ታማይኔ ቶዔና። † 47 ኔና ኔ ኣይፌይ ባሌሊኮ ዎጫ ኬሳዳ ኔፔ ዲጋ፤ ናምቡ ኣይፌራ ዳዳ ጌዳ ጋናሚን ዩጌታናፕ ኢሲ ኣይፌራ ያሳ ካዎቴሳ ጌሎይ ኔስ ሎዎ። * 48 ጋናሚን ጉፁኔይ ሃይቁና ታማይኔ ቶዔና። *

49 “ቡር ኣሲ ዉሪ ታማን ፓጩታና።

50 “ማጺኔይ ሎዎ፤ ጊዶ ኣቲን ማጺኔይ ባ ማጺኔቴሳ ዩዲኮ ኢንቴ ዎስቲ ኢዛ ማልዎ ኤራኔ? ኢንቴ ኣሳቴሳን ማጺኔይ ዳዎ። ኢንቴ ኢንቴ ጊዶን ደሴቲቴ” ጊዳስ። *

10

ማቾ ኣንጂ ዩዳናስ ቤሴና

(ማቶ 19:1-12፤ ሉቃ 16:18)

1 ዩሱሲ ሃፔ ዳንዲዲ ጌዳ ዩሁዳ ጌቲቲዛ ዳሬኔ ዮርዳናሴ ቫፋፕ ፒንሳን ዲዛ ዳሬ ቢዳስ። ዳሬይካ ቃሴ ኢዛ ዩዩ ኣጂን ኢዚ ካሴ ባ ኦሊዛ ማላ ኣሳ ታማርሲዳስ።

2 ኢሲ ኢሲ ፋርሳዌቲ ኢዛኮ ዩዲ “ኣሲ ባ ማቾ ኣንጂ ዩዳናስ ቤሴዜ?” ጊዲ ኢዛ ፓጩ ኦይሾ ኦይቺዳ።

3 ኢዚካ ኢስታስ “ሙሴይ ኢንቴና ኣይ ጊ ኣዛዚዳ?” ጊዲ ዛሪ ኦይቺዳስ።

4 ኢስቲካ ኢዛስ “ሙሴይ ታ ኢዛ ኣንጂ ዩዳዲስ ጊዛ ዋራቃታ ፃፊ ኢሚዲ ኣንጂ ጊዳስ” ጊዳ። *

5 ዩሱሲካ ዛሪዲ ኢስታ “ሙሴይ ሃይሳ ማላ ዎጋ ፃፊዳይሲ ኢንቴ ዎዝናይ ሚኒዳ ጊሻሳ። 6 ጊዶ ኣቲን ኮይር ያሲ ሜጲሼ ማጫኔ ኣዳ ኦሊ ሜጲዳስ። * 7 ሃሳ ጊሽ ኣሲ ባ ኣዋኔ ባ ኣዮ ኣጊዲ ባ ማቺራ ዋፃቴስ። 8 ናምዓይ ኢሲ ኣሾ ጊዳቴስ፤ ሃሳ ጊሽ ኢስቲ ናምዓይ ኢሲናፕ ኣቲን ናምቡ ዳቴና። 9 ሃሳ ጊሽ ያሲ ጋሊ ዋፃዳይታ ኣሲ ሻኮፎ።” ጊዳስ።

10 ቃሴካ ኢስቲ ሶ ጌሊን ኢዛ ካሊዛይቲ ሄ ዮዎዛ ጊሽ ዛሪ ኢዛ ኦይቺዳ። 11 ኢዚ ኢስታስ “ኣኒካ ባ ማቾ ኣንጂ ዩዲዲ ሃራ ማጫስ ኤኪኮ ሄ ማጫሳይ ቦላ ላይማ ኦሴስ። 12 ማጫሳያካ ባ ኣዚና ኣጋዳ ሃራ ኣዳ ጌሊኮ ኢዛካ ላይማታዉስ” ጊዳስ። *

† 9:46 ኢሲ ኢሲ ጊሻ ማፃፋቲ ፓይዶ 46 ቦላ ዲዛ ቆፋ ጉጃቴስ፤ ቆፋይካ ፓይዶ 48 ቦላ ዲዛይሳ ሚሳቴስ። * 9:47 ማቶ 5:29 * 9:48 ኢሳ 66:24 * 9:50 ማቶ 5:13፤ ሉቃ 14:34-35 * 10:4 ዛሬ 24:1-4፤ ማቶ 5:31 * 10:6 ሜጲ 1:27፤ 5:2 * 10:12 ማቶ 5:32፤ 1ቆር 7:10-11

ዩሱሲ ጉላ ናይታ ኣንጂዴዳስ
(ማቶ 19:13-15፤ ሉቃ 18:15-17)

13 ዩሱሲ ባ ኩሼ ዋላና ማላ ኣሳይ ናይታ ኢዛኮ ኤሂዳስ። ኢዛ ካሊዛይቲ ቃሴ ኤሂዳ ኣሳ ቦላ ሃንቁቲዳ። 14 ዩሱሲ ሄሳ ቤዪ ሃንቁቲዳ “ናይቲ ታኮ ዩቶ፤ ዲጎፍቲ፤ ያሳ ካዎቴሉ ሃይታንታ ማላሳ። 15 ታ ኢንቴስ ቱሙ ጋይስ፤ ያሳ ካዎቴሉ ሃይሳ ጉላ ናይታ ማላ ኤኮንታዳይ ኢዚን ሙሉካ ጌሌና” ገዴስ። * 16 ናይታ ኢዲሚዲ ኢስታ ቦላ ባ ኩሼ ዋሊዲ ኣንጂዴዳስ።

ኢሲ ዲሬ ኣዳ
(ማቶ 19:16-30፤ ሉቃ 18:18-30)

17 ሄፔ ቡሮ ኦጌ ኬዚሺን ኢሳዳይ ዎዲሼ ኢዛኮ ጋኪዲኔ ኢዛ ሲንላን ጉልባቲዲ “ኪያ ኣስታማሬንቶ! ታኒ ሜርና ዴዎ ዴማና ማላ ኣይ ኦላና ታስ ቤሲዜ?” ገ ኦይቲዳስ።

18 ዩሱሲካ “ኣዛስ ታና ኪያ ጋይ? ኢሲ ያሳፊ ኣቲን ኪያይ ባ” ገዴስ። 19 “ኒኒ ኣዛዘታ ኤሬይ? ‘ዎጶፓ፤ ላይማቶፓ፤ ካይሶቶፓ፤ ዎርዶ ማርካቶፋ፤ ኣስ ባሌላፋ፤ ኔ ኣዎኔ ኔ ኣዮ ቦንቻ’ ገዛይታ” ገዴስ። *

20 ኣዳዚካ ዛሪዲ “ኣስታማሬ! ታ ሃይታ ዉርሳ ናቴላፊ ኦይካዳ ናጋዲስ” ገዴስ።

21 ዩሱሲ ኢዛ ያሊዲኔ ደሲዲ “ሂስቲኮ ሃዒ ኔስ ኢሲ ሚሽ ፓጩስ። ባዳኔ ኔስ ዲዛ ዉርሳ ባይዛ፤ ሚሻ ማንቆታስ ኢማ፤ ኔኒ ሳሎን ሸቁዳ ሚሽ ዴማንዳሳ፤ ሂስታዳኔ ሃያ ታና ካላ” ገዴስ።

22 ኣዳዚካ ሃሳ ሲይዲ ዳር ዪሎቴዳስ። ኢዛስ ዳር ሃርይ ዲዛ ገሽ ሙዞቲሼ ቢዳስ።

23 ዩሱሲ ዩሺ ኣሊ ያሊዲ ባና ካሊዛይታ “ዱሬታስ ያሳ ካዎቴሉ ጌሎይ ኣይ ማላ ዴዎ!” ገዴስ።

24 ኢዛ ካሊዛይቲካ ኢዛ ሃሳያን ማላሌቲዳ። ዩሱሲ ቃሴ ዛሪዲ “ናይቶ! ያሳ ካዎቴሉ ጌሎይ ኣይ ማላ ዴዎ ሚሼ!

25 ዲሬይ ያሳ ካዎቴሉ ጌላናይሳፊ ጋሜላይ ናርፔ ሉኮራ ኣቆናይሲ ካዉያና!” ገዴስ።

26 ኢዛ ካሊዛይቲካ ዳርሲ ማላሌቲዲ ባ ገዶን ኢሶይ ኢሳ “ሂስቲን ኦኒ ኣታና ዳንዳዩዜ?” ገዴ።

27 ዩሱሲ ኢስታ ያሊዲኔ “ሃይሲ ኣሳስ ዴንዳዩቴና፤ ያሳ ማታን ገዲኮ ሃሳ ማላ ገዴና። ያሳስ ዉሪካ ዳንዳዩቴስ” ገዴስ።

* 10:15 ማቶ 18:3 * 10:19 ኬሳ 20:12-16፤ ዛሬ 5:16-20

28 ጳጳሮሲ ቃሴ “ሄኮ፤ ኑኒ ወርሲካ ኣጊዲ ነና ካሊዶስ” ጊዳስ።

29 ዩሱሲካ ዛሪዲ “ታ ኢንቴስ ቱሙ ጋይስ፤ ታ ጊሺኔ ሚሺራቾ ቃላ ጊሽ ጊዲ ባ ኬጱ፤ ዋይኮ ባ ኢሻታ፤ ዋይኮ ባ ሚቹታ፤ ዋይኮ ባ ኣዮ፤ ዋይኮ ባ ኣዋ፤ ባ ናይታ፤ ዋይኮ ባ ጋዴ ኣጊዲ ኣስ ወሪ፤ 30 ሃይሳ ሃ ዋዴዛን ሃዒ ጎዴቴፋራ ኬላታ፤ ኢሻታ፤ ሚቹታ፤ ኣዬታ፤ ናይታኔ ጋዴካ ፃቱ ኩሼ ኣሊ ኤኮንታይኔ ቡሮ ያና ኣላሚዛንካ ሜርና ዴዖ ላቶንታዴይ ዴና። 31 ጊዶ ኣቲን ሲንፋቲዳ ዳሮቲ ጉዬታና፤ ጉዬቲዳይቲ ሲንፋታና” ጊዳስ። *

ዩሱሲ ባ ሃይቂ ዴንዳናይሳ ሃቐንሳ ዮቲዴስ

32 ኢስቲ ዩሩሳላሚ ኤፊዛ ኦጌ ቦላ ዲሺን ዩሱሲ ኢስታፊ ሲንጼ ሲንጼ ቤስ። ኢዛ ካሊዛይቲ ኢዛ ቡሳን ማላሌቲዳ። ሃንኮ ኢዛ ጌዶን ዲዛ ኣሳይ ቃስ ኢዛስ ባቢዴስ። ቃሴካ ታማኔ ናምዓታ ዴሬዛፔ ዲማ ሻኪዲ ባ ቦላ ኣዚ ጋካናኮኔ ኢስታስ ሂዘጊ ዮቲዴስ፤ 33 “ኑኒ ዩሩሳላሚ ኬዛና፤ ኣሳ ናይ ቄሴታ ሃላቃታሲኔ ሙሴ ዋጋ ታማርሲዛይታስ ኣጂ ኢሜታና፤ ኢስቲካ ኢዛ ቦላ ሃይቆ ፒርዳ ፒርዳና ኤሬ ኣሳስ ኣሊ ኢማና። 34 ኢዛ ቦላ ቂጂ ካዳና፤ ኢዛ ቦላ ጨታና፤ ኢዛካ ጋራፋና ኦጳና ሺን ኢዚ ሃቐን ጋላሳፊ ጉዬን ሃይቆፔ ዴንዳና።”

ያቆቤይኔ ዮሃንሲ ዋሲዳ ዋሳ (ማቶ 20:20-28)

35 ቃሴ ዛቢደሳ ናይቲ ያቆቤይኔ ዮሃንሲ ኢዛኮ ሸቂዲ “ኣስታማሬ! ኑኒ ነና ዋሲዳይሳ ኔ ኑስ ወርሳ ኦፋና ማላ ኑ ኮዮስ” ጊዳ።

36 ኢዚካ ኢስታስ “ታ ኢንቴስ ኣይ ኦፋና ማላ ኮዬቲ?” ጊዳስ።

37 ኢስቲካ “ኑኒ ኔ ካዋቴላ ቦንቾ ዋዴ ኑፔ ኢሳዴይ ኔ ኡሻቻን ኢሳዴይ ኔ ሃዲርሳን ኡታና ማላ ኑስ ኤሮ ጋርኪ?” ጊዳ።

38 ዩሱሲካ “ኢንቴ ኦይቹዛይሳ ኤሬኬታ። ታኒ ኡያና ኡሻ ኡያናሲኔ ታኒ ፃማቂቲዛ ፂንቃታ ፃማቂታናስ ዳንዳያንዴቲ?” ጊዳስ። * 39 ኢስቲካ ዛሪዲ “ኤ፤ ዳንዳዮስ” ጊዳ። ዩሱሲካ “ታ ኡዬዛ ኡሻ ኢንቴ ኡያናኔ ታ ፃማቂቲዛ ፂንቃታ ኢንቴ ፃማቂታና። 40 ጊዶ ኣቲን ታ ኡሻቻራ ዋይኮ ታ ሃዲሪሳራ ኡቴሊ ያሲ ኢስታስ ጊሲዳይታስ ኣቲን ታ ኢማና ሚሽ ጊዴና” ጊዳስ።

* 10:31 ማቶ 20:16 * 10:38 ሉቃ 12:50

41 ታማቲ ሄሳ ሲይዱ ያቆቤኔ የሃኒሳ ቦላ ሃንቁቲዳ።
 42 ዩሱሲካ ኢሲ ቦላ ሺሺዱ “ዳሬ ሃላቃ ጌቴተዛይቲ ዳሬ ሃሪዛይሳ ማላ ኢስታ ሹማቲ ኢስታ ቦላ ባ ጎዳቴላ ቤሲዛይሳ ኢንቴ ኤሬታ። 43 ጊዶ ኣቲን ኢንቴ ጊዶን ጊታ ጊዳና ኮዩዛ ኡባይ ኣሸካራ ጊዶ። * 44 ሲንጮ ኣቆና ኮዩዛይ ወሪካ ኡባሰ ኣይሌ ጊዶ። 45 ኣሳ ናይ ጊዱኮ ኣሳሰ ኦላናሲኔ ባ ሹምፖ ዳርታ ጊሽ ኣሉ ኢማናሰ ዩዴሰ ኣቲን ኣሴ ኦሲሳናሰ ዩቤና።” ጊዴሰ።

ዩሱሲ ቆቄ ባርጃሞሳ ኣይፌ ፓሊዴሰ
 (ማቶ 20:29-34፤ ሉቃ 18:35-43)

46 ሃፔ ጌዴ ያርኮ ቢዳ። ዩሱሲኔ ኢዛ ካሊዛይቲ ሃራ ዳር ኣሳታራ ኢያርኮፌ ኬዚሺን ጃሞሳ ና ባርጃሞሳ ጌቴተዛ ኣይፌ ቆቄይ ኦጌ ቦላ ኡቲዱ ዋሴሰ። 47 ኢዚካ ዩዛይ ናዚሬቴ ዩሱሳ ጊዱዳይሳ ሲይዱ “ዳወቴ ና ዩሱሳ ታና ማራ” ጊዱ ኬሂ ዋሲዴሰ።

48 ዳርቲ ኢዚ ጮፀ ጋና ማላ ሃንቁዳ፤ ጊዶ ኣቲን ኢዚ “ዳወቴኖ! ታና ማራ” ጊዱ ኬሂ ዋሲዴሰ።

49 ዩሱሲካ ኤቁዱ “ኢዛ ሃ ጃይገቴ” ጊዴሰ። ኢስቲካ ቆቄዛ “ኣይኮይ ባ ዴንዳ ኔና ጃይገሰ” ጊዳ። 50 ኢዚካ ባ ማይዖ ቃሪ ዩጊዱ ፑሱኩ ጊ ዴንዱ ኤቁዱ ዩሱሳኮ ዩዴሰ።

51 ዩሱሲካ “ታ ኔሰ ኣይ ኦላና ማላ ኮያይ?” ጊዴሰ። ቆቄዚካ “ኣስታማሬንቶ! ታ ጃላናዉ ኮያይሰ” ጊዴሰ።

52 ዩሱሲካ ዛሪዱ “ባ ኔና ኔ ኣማኖይ ፓሊዴሰ” ጊዴሰ። ሄራካ ኢዛ ኣይፌይ ጃሊዴሰ። ኢዚካ ዩሱሳ ካሊ ቢዴሰ።

11

ዩሱሲ ጊታ ቦንቾራ ዩሩሳላሜ ጌሊዴሰ
 (ማቶ 21:1-11፤ ሉቃ 19:28-40፤ ዮሃ 12:12-19)

1 ኢስቲ ጌዴ ዩሩሳላሜን ዳብራዛይቲ ጌቴተዛ ዙማ ኣቻን ዲዛ ቤቴፋጌኔ ቢታኒያ ጌቴተዛሶ ማቲዳ ዎይ ዩሱሲ ባና ካሊዛይታፔ ናምዓታ ሂዘጊ ከቲዴሰ። 2 “ጌዴ ኢንቴ ሲንላን ዲዛ ጉታዮ ቢቴ። ኢንቴ ሄ ጌሊዳ ማላ ሃን ኣሲ ቶጊ ኤርንታ ቃሾን ዲዛ ሃራ ጉቴ ኢንቴ ዴማና፤ ቢርሺዱ ኢዛ ሃ ኤኪ ዩቴ። 3 ኦኒካ ኢንቴና ‘ሃይሳ ኣይሰ ኦሌቲ?’ ጊኮ ጎዳሰ ኮሼሰ ጊዱ ዮቲቴ፤ ኢዚካ ኢንቴሰ ኤሶን ዛሪ ዩዳና” ጊዴሰ።

* 10:43 ሉቃ 22:25-26

4 ኢስቲካ ቢዲ ኢሲ ከላ ካሪን ኦጌ ቦላ ቃሾቲ ዲዛ ሃሪ ጉቱ ዳሚዲ ቢርሺዲ። 5 ህን ኤቁዳ ኢሲ ኢሲ አሳቲ “ሃሪ ጉቱዛ አዛስ ቢርሺቲ?” ጊ ኦይቸዳ።

6 ዩሱሳ ካሊዛይቲ ዩሱሲ ኢስታስ ጊዳ ማላ አሳታስ ዮቲን ኤሮ ኤኪ ቦቲ ጊዳ። 7 ጉቱዛካ ዩሱሳኮ ኤሂዲ ባ ማይያ ኢዛ ዘኮ ቦላ ዩጊን ዩሱሲ ኢዛ ቶጊዴስ። 8 ዳሮ አሳይ ባ ማይያ ኬሲ ኬሲ ኦጌ ቦላ ሚጨዴስ። ባጋ አሳይ ጨሊላ ሚላ ሃይላ ቃንፂ ቃንፂዲ ኦጌ ቦላ ላሊዴስ። 9 ዩሱሳገፔ ሲንላራኔ ጉዩራ ዲዛ አሳይ ቃላ ቶቁ ሂስቲዲ

“ሆሳና፤

ጎዳ ሱንላን ዪዛይይ አንጃቲዳዴ።

10 ሃና ዪዛራ ኑ አዋ

ዳወቴ ካዎቴላያ አንጃቲዳሮ፤

ሆሳና!

ቦላ ሳሎን ያሲ ቦንቸቶ”

ጊሼ ዋሲዴስ።

11 ዩሱሲ ዩሩሳላሜ ጋኪዲ ሃሳፊካ ያሳ ኬሌ ጌሊዴስ። ህ ህራን ዲዛይሳ ወርሲ ፆሊዲ ጋይይ ቃሚዳ ጊሽ ታማኔ ናሞባታራ ጌዴ ቢታኒያ ኬዚዴስ።

ዩሱሲ ቃንጊዳ ባላሴ ሚላዮ

(ማቶ 21:18-19)

12 ዋንቴላ ጋላስ ኢስቲ ቢታኒያፔ ኬዚ ቢሺን ዩሱሲ ጋፊዴስ።

13 ኢዚ ኢሲ ሃይላ ጨሊሊዳ ባላሴ ጌቲቲዛ ሚላ ሃሆን ቤዩዲ አይፊይ ዳናኮኔ ጊዲ ኢዚኮ ዪዴስ። ጊዶ አቲን ባላሴ ሚላ አይፎንታ ዋዴ ጊዲዳ ጊሽ ሃይላፊ አቲን ኢሲ አይፊካ ኢዚፔ ዳሚቤና። 14 ህሳ ጊሽ ሚላዮ “ሃኒፊ ጉዩ ሚርናስ ኦኒካ ኔፔ አይፊ ሞፖ!” ጊዴስ። ኢዛ ካሊዛይቲካ ኢዚ ጊዛይሳ ሲዪዳ።

15 ጌዴ ዩሩሳላሜ ቢዳ፤ ህፔካ ጌዴ ያሳ ኬሌ ጌሊዲ ህን ባይዚዛይታኔ ሻሚዛይታ ኬሲ ጎዶ ኦይኪዴስ። ሚሼ ላሚዛይታ ፃራጳዛኔ ሃራጳ ባይዚዛይታ ኦይዴ ጉፋንላ ጉፋንላ ዩጊዴስ።

16 አኒካ አይ ሚሽ ቶኪዲ ያሳ ኬሌ ጊቤ ጊዶራ አቶንታ ማላ ዲጊዴስ። 17 ኢስታካ ታማርሲሼ “ታ ኬላ ዴሬ ኡባሰ ዋሳ ኬሌ ጊዳና ጌቲቲ ፃፊቲቤኔ? ጊዶ አቲን ኢንቴ ቃሴ ካይሶታ ጎንጎሎ ኬሲዳታ” ጊዴስ። *

* 11:17 እሳ 56:7፤ ኤር 7:11

18 ቁሴታ ሃላቃቲኔ ሙሴ ዋጋ ታማርሲዛይቲ ሃሳ ሲይዲ ኢዛ ዋስቲ ቆይሳናኮኔ ኦጌ ኮሽ ኦይኪዳ። ጊዶ ኣቲን ዳሬይካ ኢዛ ቲሚርቲዛን ማላሌቲዳ ጊሽ ኢዛሰ ባቢዳ።

19 ኢሰቲካ ጋዴይ ቃሚን ካታማይፔ ኬዚ ቢዳ።

20 ዋንቴላ ጋላስ ማላዶ ኢሰቲ ኦጌሪ ኣቋ ቢሽን ባላሴ ማላያ ፃጶፔ ሜሊዳሮ ቤዪዳ። 21 ዮዖዚ ኢዛ ዋዝናን ኣኬኬቲን ጸፅሮሲ ዬሱሳ “ኣስታማሬ! ሄኮ፣ ሃና ኔ ቃንጊዳ ባላሴያ ማላዱስ” ጊዳሰ።

22 ኢዚካ ዛሪዲ “ዖሳ ኣማንቴ። 23 ታ ኢንቴሰ ቱሙ ጋይሰ፤ ‘ኣኒካ ሃይሳ ዙማዛ ኔ ቆቃሌታዳ ጌዴ ኣባን ጌላ’ ጊዛኮኔ ሃሳካ ዋዝናን ሲቆንታ ኣማኒዳኮ ኢዛዳሰ ሃናና። * 24 ሃሳ ጊሽ ኢንቴ ዋሳን ኦይቹዳዝ ወርሲ ኤኪዳ ማላ ኣማኒኮ ኢንቴሰ ሃናና። 25 ሃሳሶካ ኢንቴ ዋሳሰ ኤቁዛ ዋዴ ኢንቴ ሳሎ ኣዋይ ኢንቴ ናጋራ ኣቶ ጋና ማላ ኢንቴካ ኢንቴና ቆሃዳይታ ናጋራ ወርሲ ኣቶ ጊቴ። 26 ኢንቴ ኣቶ ጎንታ ኢዳኮ ኢንቴ ሳሎ ኣዋይካ ኢንቴ ናጋራ ኣቶ ጌና።” ጊዳሰ። **

27 ቃሴካ ዬሩሳላሚ ዪዳ። ዬሱሲ ዖሳ ከሌ ካሬ ጊዶን ጌዴኔ ሃኔ ዩዬቲሽን ቁሴታ ሃላቃቲ፣ ሙሴ ዋጋ ታማርሲዛይቲኔ ዳሬ ጨማቲ ኢዛኮ ሽቂዳ፣ 28 “ሃይሳ ኔ ኦሊዛይ ኣይ ጎዳቴላራ? ሃይታ ኔ ኦላና ማላ ሃይሳ ማላ ጎዳቴላ ኔሰ ኦኒ ኣሚዳ?” ጊዳ።

29 ዬሱሲካ ኢሰታሰ ዛሪዲ “ኣኔ ታካ ኢንቴና ኢሲ ኦይሾ ኦይቻይሰ ኢንቴካ ታሰ ዛሪኮ ታካ ሃ ዮዖታ ኣይ ጎዳቴላራ ኦሊዛኮኔ ኢንቴሰ ዮታና። 30 ዮሃኒሳ ዲንቃቴይ ዖሳፌዬ? ኣሳፔ? ኣኔ ታሰ ዛሪቴ” ጊዳሰ።

31 ኢሰቲካ ባ ጊዶን ኢሶይ ኢሳራ “ኑ ሳሎፔ ጊኮ ኢዚ ኑና ሂሰቲን ኣዛሰ ኢዛ ኣማኒቤይኬቲ?’ ጋና፤ 32 ‘ኑ ኣሳፔ’ ጊኮ” ዮሃኒሲ ቱሙ ናቤ ጊዲዳይሳ ዳሬይ ወሪ ኣማኒዛ ጊሽ ሃሳሶ ጋና ባቢዳ።

33 ሃሳ ጊሽ “ኑ ኤሮኮ” ጊዲ ዬሱሳሰ ዛሪዳ። ዬሱሲካ “ሂሰቲኮ ታ ሃይታ ኣዛ ጎዳቴላራ ኦሊዛኮኔ ታካ ኢንቴሰ ዮቲኬ” ጊዳሰ።

* 11:23 ማቶ 17:20፤ 1ቆሮ 13:2 * 11:26 ኢሲ ኢሲ ጌሻ ማፃፋቲ ፓይዶ 26 ቦላ ዲዛ ቆፋ ጉጃቴሰ። * 11:26 ማቶ 6:14-15

12

ዎይኔ ሚሊ ቶኪዛ ጎሻ አሳታ ለሚሶ
(ማቶ 21:33-46፤ ሉቃ 20:9-19)

1 ቃሴ ኢስታሰ ለሚሶራ ዮተሼ “ኢሳዳይ ባ ዎይኔ ሚሊ ቶኪዳሰ። ኬላ ዩሼ አሉ ኬሊዳሰ፤ ዎይኔ ሚላ አይፌ ጉምዓና ኦላ ቦኪዳሰ። ናጌ ኬሌካ ኬዲዳሰ። ሄሳፌ ጎሻንቻታሰ ኪራ ኢሚዲ ሃራ ዳሬ ቢዳሰ። 2 ሚላይ አይፊዛ ዎዴ ዎይኔ ሚላ አይፌ ኤካዳ ያ ጊዲ አሸካራታፔ ኢሳዴ ጎሻንቻታኮ ዩዲዳሰ። 3 ጎሻንቻቲ አሸካራዛ ኦይኪ ሾጪዲ ጮ ሚላ ኩሼ ዩዲዳ። 4 ናምዓንሎካ ሃራ አሸካራ ዩዲዳሰ። ጎሻንቻቲ ሃዲካ አሸካራ ኦይኪዲ ኢዛሰ ሁዔታራ ቆዒዲኔ ካወሺዲ ዛሪ ዩዲዳ። 5 ሃዲካ ዛሪዲ ሃራ አሸካራ ዩዲዳሰ። ሄ ዩዳይሳካ ዎዲዳ፤ ሃራ ዳርታ ጊዳፌ ኢሲ ኢሲ አሳታ ቆዲዳ፤ ባጋይታ ዎዲዳ።

6 “ሃዲካ ኪቶንታ አተዛ ሃራይ ዳሰ፤ ኢዚካ አዎይ ደሲዛ ኢዛ ናዛ። ‘ታ ናዛ ኢሲቲ ቦሳና’ ጊ ቆፒዲ ወርሴላን ባ ናዛ ዩዲዳሰ። 7 ጎሻንቻቲ ቃሰ ባ ጊደን ‘ሃይሲ ዎና ኢዛ ላታና ናዛ፤ ሃ ዩቲ ኑ ኢዛ ዎዲኮ ቢታይ ኑሰ ጊዳና’ ጊዳ። 8 ሄሳ ጊሽ ሄን ኦይኪ ዎዲዳ ዎይኔ ሚላያ ዲዛሶፔ ሃራሶ ኬሲ ዩጊዳ።

9 “ሂሰቲን ዎይኔ ሚላ ጎዳይ አንቴሰ እይ ኦላና ሚሳቲዜ? ኢዚ ያና፤ ጎሻንቻታካ ዎዲዳ፤ ዎይኔ ሚላ ሃራታሰ ኢማና። 10-11 ጌሻ ማፃፋን

‘ሹቻ ኬሌ ኬዲዳይቲ ሃኔና ጊዲ ዎራ ዩጊዳ ሹቻይ ኬላ ማዛኔሰ ቦላ ሁዔ ጊዲዳሰ፤

ሄሳካ ጎዳይ ኦላዳሰ። ሄሲካ ኑ አይፌሰ ማላሊሲዛዝ ጌቲቲዲ ዓፌቲዳይሳ ናቤቢቤኬቲ?’ ” ጊዳሰ። **

12 ኢዚ ኢስታሰ ለሚሶዛ ዮተዳይ ኢሰታ ጊሽ ጊዲዳይሳ አይሁዳ ሃላቃቲ ኤሪዳ ጊሽ ኢዛ ኦይካናሰ ኮይዳ። ጊዳ አቲን አሳሰ ባቢዳ ጊሽ አጊ ቢዳ።

ጊራ ጊሽ ሺቁዳ ኦይሾ
(ማቶ 22:15-22፤ ሉቃ 20:20-26)

13 ዩሱሳ ዮንን ቃፃና ማላ ፋርሳዌታፔኔ ሄርዶሳ ባጋታፔ ጉላ አሳታ ደሪዲ ኢዛኮ ዩዲዳ። 14 ኢስቲካ ኢዛኮ ዩዲ “አስታማሬ!

* 12:10-11 ማዲዜ ሹቻይ፣ ቱሲ ኬሌ ናጊዛይሳ ማላ ሹቻ ኬሌ ኩንዶንታ ማላ ናጊዛይሳ። * 12:10-11 ማዛ 118:22-23

ኔን ሞሮይ ባይንዳ አስ ገዲዳይሳ ኑ ኤሮስ፤ ኔ ኦናስካ ባባዳ ሞሮዶ ማዳካ፤ ያሳ ኦጌ ያላላ ቱሙ ታማርሳሳ። ኦሮሜ ካዎ ቁሳሬስ ገራ ቃንፃናስ ቤሲዜዬ? ቤሲኔ? ኑ ቃንፃኖዬ? ቃንፃፊኖ?”

15 ዩሱሲ ኢስታ ኦይሾይ ቆጴጥ ቆሞ ገዲዳይሳ ኤሪዲ “አዛስ ታና ቃፃና ኮዬቲ? እኔ ኢሲ ዲናሬ ሃሚቲ ታ ቤያይስ” ገዴስ።

16 ኢስቲካ ሚሻ ኤሂን “ሃይሲ ኢዛ ቦላ ዲዛ ሚሲሌዚ ኦና ሚሲሌ? ኢዛ ቦላ ፃፊቲዳይሲ ኦና ገዜ?” ገዴስ። ኢስቲካ “ቁሳሬይሳኮ” ገዴ። 17 ዩሱሲካ “ቁሳሬይሳ ቁሳሬስ፣ ያሳይሳ ያሳስ አሚቲ” ገዴስ። ኢስቲካ ኢዛ ዛርን ማላሌቲዳ።

ሃይቆጥ ዴንላ ገሽ ሸቁዳ ኦይሾ
(ማቶ 22:23-33፤ ሉቃ 20:27-40)

18 ሄሳፊ ጉዬ ሃይቁዳይታስ ሃይቆጥ ዴንላ ባዎ ገዛ ሳዱቃዌቲ ኢዛኮ ዩዲ ኢዛ ሂዝጊ ኦይቺዳ። * 19 “አስታማሬ! ኢሲ አሲ ማቾ ኤኪዲ ና ዩሎንታ ሃይቁኮ ሃይቁዳይሳ አሻይ ኢዛ ማቺዮ ኤኪዲ ኢዛስ ላታ ና ዩላና ማላ ካሴ ሙሴይ ኑስ ፃፊዴስ። * 20 ገዶ ኦቲን ላፑን አሻንቲ ዴቲስ፤ ኢስታፊ ባይራይ ማቾ ኤኪዲ ና ዩሎንታ ሃይቁዴስ። 21 ካሎዚ ሄ ማጫሳዮ ኤኪዲ ሃሲካ ና ዩሎንታ ሃይቁዴስ፤ ሄሻንሳይካ ዩሎንታ ሃይቁዴስ። 22 ላፑናቲካ ሄ ማጫሳዮ ኤኪዲ ላታ ዩሊቤቲና ዉርሴላን ማጫሳያካ ሃይቃዴስ። 23 ሂስቲን ላፑናቲካ ኢዛ ኤኪዳሽን ሃይቆጥ ዴንዶይ ዲዛ ገዲኮ ሃ ማጫሳያ ኢስታፊ ኦና ማቾ ገዳኔ?” ገዴ።

24 ዩሱሲካ ኢስታስ “እንቲ ባሌቲዛይ ጌሻ ማፃፋታኔ ያሳ ዎልቃ ኤርንታ ገሻሳ። 25 ሃይቁዳይቲ ዴንዲዛ ዎዴ ሳሎ ኪታንቻታ ማላ ገዳና ኦቲን ኤኬቲቲናኔ ጌሌቲቲና። 26 ሃይቁዳይታ ዴንላ ገሻሰ ገዲኮ ሙሴ ማፃፋን ሄሲካ ቁሪ ዎራ ገደን ኤዪዛ ታማ ገዶፊ ያሲ ታኒ ኣብራሃማ ያሳ፤ ዩሳቃ ያሳ፤ ያቆሴ ያሳ፣ ገዛይሳ ናባቢቤኬቲ? * 27 ያሲ ፓፃታ ያሳ ኦቲን ሃይቁሳታ ያሲ ገዴና። ሄሳ ገሽ አንቲ ዳር ባሌቲዳታ” ገዴስ።

28 ኢስቲ ፓላማን ዲሽን ፃፊታፔ ኢሳዴይ ኢስታ ፓላማ ሲይዲኔ ዩሱሲ ኦይሾቲዳይሳስ ሎዔሳ ዛሪዳይሳ ኦኬኪዲ “ኤሮ! ኦዛዘታፔ ኡባፊ ኦጲዛይ ኦዎይሴ?” ገዲ ኦይቺዴስ።

* 12:18 ሃዎ 23:8 * 12:19 ዛሬ 25:5 * 12:26 ኬሳ 3:6

29 ዩሱሲ ኢዛሰ ሂዘጊዳሰ “ኡባፌ አዲዛይ ሃይሳ ‘ኢሰራዔሌ ሲያ! ጎዳ ያሲ ኢሲ ጎዳ፤ 30 ኔካ ጎዳ ኔ ያሳ ኔ ኩሜላ ዋዝናፔ፤ ኔ ኩሜላ ሽምፖፌ፤ ኔ ኩሜላ ቆፋፔ፤ ኔ ኩሜላ ዋልቃፌ ደሳ።” 31 ናምዓንጸይካ ‘ኔ ላጌ ኔ ሁዔ ማላ ደሳ’ ሃ ናምዓታፔ አዲዛ አዛዘይ ባዋ።” * 32 ዓፌዚካ “አሰታማሬ፤ ሎዖ ጋደሳ፤ ‘ዖሲ ኢሲኖ ጊዲዳይሳኔ ኢዛፔ ሃራይ ባይንዳይሳ’ ኔ ዮተዳይሲ ሊኬ።” * 33 ኢዛ ኔ ኩሜላ ዋዝናፔ ኔ ኩሜላ ቆፋፔ ኔ ኩሜላ ዋልቃፌ ደሳይ ቃሴካ ኔ ላጌ ኔ ሁዔ ማላ ደሳይ ፀጌተዛ ያርሾፌኔ ሃራ ያርሾ ኡባፌ አዲሰ” ጊዳሰ። * 34 ዩሱሲካ አዳዚ ዩሺ ቆፒዲ ዛሪዳይሳ ቤዩዲ “ኔጊ ያሳ ካዋቴላፌ ሃሆን ዳካ” ጊዳሰ። ሄሳፌ ጉዬ ኢዛ ኦይቻናሰ ዓሊዳዳይ ቤተቤና። *

35 ዩሱሲ ያሳ ኬሌ ጋላን ታማርሲሼ “ሙሴ ዋጋ ታማርሲዛይቲ አዛሰ ‘ኪርሰቶሳ ዳወቲ ና’ ጊዛ? 36 ዳወቲይ ዪሎ አያናን ሃሳዩሼ ‘ጎዳይ ታ ጎዳ ኔ ሞርኬታ ታ ኔ ቶሆ ጋርሰ አላና ጋካናሰ ታ ኡሻቻን ኡታ ጊዳሰ’ ጌሰ።” * 37 ሂሰቲን ዳወቲይ ባ ዲናራ ኢዛ ‘ጎዳ’ ጊኮ ዋኒዲ ሲሚ ኢዛሰ ና ጊዳኔ?’” ጊዳሰ። ዳር ዳሬይካ ኢዚ ጊዛይሳ ኡፋይሳራ ሲዩዳሰ።

38 ኢዚ ታማርሲሼ “ሙሴ ዋጋ ታማርሲዛይታፔ ናጌቲቲ፤ ጋዳራ ጎሼተዛ አዲሳ ማይዖ ማይዒዲ ዩሽ ዩያና ደሴቴሰ፤ አዋንካ አዲ አዲ አሲ ኢሰታሰ ቦንቾ ሳርታ ኢማና ማላ ኮዩቴሰ። 39 አይሁዳታ ዋሳ ኬላን ቶቃሶ፤ ጊቢራሶካ ቦንቾሶ ኮዩቴሰ። 40 ኢሰቲ አዚናይ ባይንዳ ማጫሳ ኬላ ካሎሴቴሰ፤ ቃሴካ ባና ቤሳናሰ አዲሳ ዋሳ ዋሴቴሰ። ሃይታንቲ ኢታ ፒርዳ ፒርዳታና” ጊዳሰ።

አምዔይ ሙፀዋታ
(ሉቃ 21:1-4)

41 ዩሱሲካ አሳይ ሙፀዋታ ዩጊዛሶን ኡተዲ ዳር አሳቲ አሚዛይሳ ያሳ ኬላ ሚሻ ሺሺዛ ሳዩኔን ዩጊዛይሳ ያሊዳሰ። ዳር ዱራቲ ዳር ሚሽ ዩጊዳ። 42 ኢሲ አዚናይ ባይንዳ አምዔ ዲዛራ ኢሲ ሲኪናፌ ዳርንታ ዓርቂማላ ቢራታፔ ኦሴቴዳ ናምዑ ሚሽ ዩጋዲሰ። 43 ዩሱሲ ባና ካሊዛይታ ያይጊዲ “ታ ኢንቴሰ ቱሙ ጋይሰ፤ ሳዩኔዛን ዩጊዳ ኡባፌ ሃና ማንቆ አምዔያ አዲሳ ዩጋዲሰ። 44 ሃይቲ ዉሪ ባሰ ዲዛ ቲርፓ ሚሻፌ ዩጊዳሺን ሃና

* 12:31 ለዌ 19:18 * 12:32 ዛሬ 4:35 * 12:33 ሆሴ 6:6 * 12:34 ሉቃ 10:25-28 * 12:36 ማዛ 110:1

ቃሴ ባ ማንቆቴላፌ ባሰ ዲዛይሳ ሲንላፌ ኢዞ ኮሺዛይሳራ ዉርሳ ኢማዲሰ” ጊዴሰ።

13

ጾሳ ኬሌ ላሌታናይሳ ዩሱሲ ካሴቲዲ ዮቲዴሰ

(ማቶ 24:1-2፤ ሉቃ 21:5-6)

1 ኢዚ ጾሳ ኬላፌ ኬዚሺን ኢዛ ካሊዛይታፔ ኢሶይ “ኣሰታማሬ! ሃይሲ ኬላይኔ ኬላይ ኬፃቲዳ ሹቻይ ኣይ ማላ ሎዲዛኮኔ ሃይሳ ቤያይ?” ጊዴሰ። 2 ዩሱሲካ ዛሪዲ “ሃይታ ጊታ ኬላታ ሃላይ? ሹቻቲ ኢሶይ ኢሳ ቦላ ዲዛ ማላ ዴቴና፤ ዉሪካ ላሌታና” ጊዴሰ።

ዎዴ ዉርሴላ ማላታታ

(ማቶ 24:3-14፤ ሉቃ 21:7-19)

3 ዩሱሲ ጾሳ ኬላ ጊናራ ዲብራዛይቴ ዙማ ቦላ ኡቲዲሺን ጴፅርሰ፣ ያቆቢ፣ ዮሃኒሰኔ ኢንዲራሲ ፃላ ኢዛኮ ሸቂዲ፣ 4 “ሃይሲ ኣይዴ ሃናናኮኔ ኑሰ ዮታ። ሃይሲ ዉርሴላን ፖሌታናሰ ማላታይ ኣዜ?” ጊ ኦይቺዳ።

5 ዩሱሲካ ኢሰታሰ “ኦኒካ ኢንቴና ባሌሉንታ ማላ ናጌቲቴ። 6 ቡር ዳርቲ ‘ታ ኪርሰቶሳ’ ጊሹ ታ ሱንላን ያና፤ ዳርታካ ባሌላና። 7 ኢንቴ ኦላኔ ኦላ ዎሬ ሲዪዛ ዎዴ ዳጋሞፍቴ። ሄሲ ሃናናይሲ ኣቴና። ዉርሴላ ጊዲኮ ቡርና። 8 ዴሬይ ዴሬ ቦላ ካዎይ ካዎ ቦላ ዴንዳና፣ ዳርሶን ቢታ ቃሌኔ ኮሻይ ሃናና፤ ሄይቲ ዉሪ ሚፃሰ ሌሶ ማላ።

9 “ኢንቴ ኢንቴሰ ናጌቲቴ። ቡር ኢንቴና ዴሬ ዲላታን ኣሌ ኢማና። ኢሰቲ ኢንቴና ኣይሁዳታ ዎሳ ኬላን ጋራፋና። ኢንቴ ታ ማርካታ ጊዳና ማላ ታ ጊሽ ዴሬ ዳናታ ሲንላኒኔ ካዎታ ሲንላን ኤቃና። 10 ኮይርቲዲ ሚሺራቾ ቃላይ ዴሬ ኡባሰ ሳባኬታና ቤሴሰ። 11 ኢንቴ ኦይኬቲዲ ፒርዳሰ ሸቂዛ ዎዴ ሂና ሄ ሳቴዪን ኢንቴሰ ኢማቲዛር ሃሳዪቴ ኣቲን ቢዲ ኑ ኣይ ጊኖ? ጊዲ ካሴቲ ሂርጎፍቴ። ሃሳያናይ ፃሎ ኣያናፔ ኣቲን ኢንቴና ጊዴኬታ። *

12 “ኢሻይ ኢሻ፣ ኣዎይ ባ ና ሃይቆሰ ኣሌ ኢማና፤ ናይቲ ባና ዩሊዳይታ ቦላ ማካላናኔ ዎሳና። 13 ታ ጌዶን ኢንቴ ኣሳ ኡባን ኢፃቲዳይታ ጊዳና። ዉርሴላ ጋካናሰ ሚኒ ኤቂዳዴይ ጊዲኮ ኣታና። *

* 13:11 ማቶ 10:17-20 * 13:13 ማቶ 10:22

ዬሩሳሌም ቦላ ጋካና ጊታ ሜቶ
(ማቶ 24:15-21፤ ሉቃ 21:20-24)

14 “እንገቱ ሃራሲዛ ቱናቴሌ እዛሰ ቤሶንታሶን ኤቁዳሼ ቤይኮ ናባቢዛዴይ ዋዝናን ዋሶ፤ ዩሁዳን ዲዛይቲ ፑዴ ዙማ ቦላ ባቃቲቶ። * 15 ኬላ ካሬን ዲዛዴይ ሶ ጌሎፖ፤ ባ ሚሽ ኬሳና ጊዲ ኬሌ ጌሎፖ። 16 ጎሻሶን ዲዛዴይ ባ ማይዖ ኤካናሰ ጉዬ ሲሞሮ። * 17 ሄ ጋላሳታን ሻራ ማጫሳታሲኔ ና ቶንሊዛይታሰ አዩ-አና! 18 ሄሲካ ባልጎን ጊደንታ ማላ ያሴ ዋሲቲ። 19 ኮይሮ ያሲ ሜዴቲላ ወርሲ ሜዶሶፔ ሃሲ ጋካናሰ ዋይኮ ሃይሳፌ ጉዬ እዛ ሚሳቲዛይ ባይንዳ ጊታ ሜቶይ ሃናና። * 20 ጎዳይ ሄ ጋላሳታ ቃንሎንታኮ ኦኒካ ኣቴና ሺን ባሲ ዶሬቲዳይታ ጊሽ ሄ ጋላሳታ ቃንሊዴሰ።

21 “ሄ ዋዴ ኦኒካ ሄኮ ኪርሰቶሲ ሃይሳን ዴሰ፤ ጊኮ ዋይኮ ሄኮ ሄን ዴሰ ጊኮ ኣማኖፕቲ። 22 ዋርዶ ኪርሰቶሳቲኔ ዋርዶ ናቤቲ ቡሮ ዴንዲዲ ማላታታኔ ካሴ ሃኒ ኤርንታ ፓላ ሚሽ ኦላና። ኢሰታሰ ዳንዳዬቲኮ ሃራይ ኣቶ ሺን ዶሬቲዳይታካ ባሌላና። 23 ሃሳ ጊሽ ናጌቲቲ፤ ሄ ዋዴይ ጋኮንታ ዲሺን ሃራ ሃይሳ ወርሳ ታ ኢንቴሰ ዮታዲሰ።

ኪርሰቶሳ ናምዓንሎ ዩሰ
(ማቶ 24:29-31፤ ሉቃ 21:25-28)

24 “ሄ ዋዴ ሄ ሜቶዛፔ ካሊዲ ኣዋ ኣርሼይ ቋማና፤ ኣገናይካ ፖዑሱኩ።

25 ያሊንቴቲ ሳሎፔ ቆቆፌታና፤ ሳሎን ዲዛ ዋልቃማቲ ቃፃና። *

26 ሄ ዋዴ ኣሳ ናይ ጊታ ዋልቃራኔ ቦንቸራ ሳሎ ሻራራ ዩሺን ኣሳይ እዛ ቤያና። * 27 ኢዚካ ኪታንቻታ ዩዲዲ ኦይዲ ባጋፌ ቢታ ጋፃፔ ጋፃ ጋካናሰ ዲዛ ባሰ ዶሬቲዳይታ ሺሻና።

ባላሴ ሚላይ ለሚሶ
(ማቶ 24:32-35፤ ሉቃ 21:29-33)

* 13:14 ዳኔ 9:27፤ 11:31፤ 12:11 * 13:16 ሉቃ 17:31 * 13:19 ዳኔ 12:1፤ ኣጁ 7:14 * 13:25 ኢሳ 34:4፤ ኣጁ 6:13፤ ኢዩ 2:10 * 13:26 ዳኔ 7:13፤ ኣጁ 1:7

28 “ለሚሶዛ ባላሴ ሚላፌ ታማሪቴ። ኦንቁሎይ ጨለሊዛ ዋይ ሃይሉ ከሲሸን ቦኔይ ማተዳይሳ አንቴ ኤሬታ። * 29 ሄሳዳካ ሃይቲ ታ ገዳይቲ ፖሌቲሸን አንቴ ቤይኮ ዋይይ ማቲ ዩዲ ፔንጌ ጋኪዳይሳ ኤሬቴ። 30 ታ አንቴሰ ቱሙ ጋይሰ፤ ሃ ዮዖቲ ፖሌታና ጋካናሰ ሃይሲ ሃ ዩሌታይ አዴና። 31 ሳሎይኔ ሳዓይ አጻና ሸን ታ ቃላይ ገዲኮ አዴና።

ጎዳይ ያና ጋላሳዮኔ ሳቴዮ ኦኒካ ኤሬና
(ማቶ 24:36-44)

32 “ቃሴ ሄ ጋላሳይ ገሸ ዋይኮ ሄ ሳቴይ ገሸ ታ አዋፔ አቲን ሳሎ ከታንቻታ ገዲንካ ናዛ ገዲንካ ኦኒካ ኤሬና። 33 ሄሳ ገሸ ዋይይ አይዳኮኔ አንቴ ኤርንታ ገሸ ናጌቲቴ፣ ሚኒቴኔ ዋሲቴ። 34 ሄሲካ ባ ከሌ አሸካራታሰ አገዲ አሸካራታ አሳ አሳ ኦሶ ኦይሌዲ ፔንጌ ናገዛይሲ ቤገዲ ናጋና ማላ አዛዚዲ ቢዳ አሳ ሚሳቴሰ። *

35 “ሂሰቲኮ ከላ አዋይ አይዳ ያናኮኔ ዋይኮ ቃማ ሌላ ገደላ ያናኮኔ ዋይኮ ኮይሮ ኩቶይ ባቁሸን ያናኮኔ ዋይኮ ዋንታ ቦላ ባዘይ ዞሲሸን ያናኮ አንቴ ኤርንታ ገሸ ቤገዲ ናጌቴ። 36 አንቴ ቆፖንታ ዲሸን አዚ ዩዲ አንቴ ዲሰኪዲሸን አንቴና ዳዋፎ።

37 “ታ አንቴሰ ዮቲዛይሳ አሳ ኡባሰ ዮታይሰ፤ ሚኒዲ ናጌቲ! ጋይሰ” ገዴሰ።

14

አሳይ ዩሱሳ ዋጻናሰ ማቂቲዳሰ
(ማቶ 26:1-5፤ ሉቃ 22:1-2፤ ዮሃ 11:45-53)

1 ፓዚጋኔ ኡኬላ ሙሳ ባዓሌ ጋላሳይ ቦንቹታናሰ ናምዑ ጋላሲ አቲሸን ቁሴታ ሃላቃቲኔ ሙሴ ዋጋ ታማርሲዛይቲ ዩሱሳ ባሌሌ ኦይኪዲ ዋጻና ኦጌ ኮይዳ። * 2 ገደ አቲን “አሳይ ሜቶ ሜዶንታ ማላ ባዓሌ ጋላሳታን ገደፖ” ገደ።

3 አዚ ቢታኒያ ጌቲቲዛ ሶን አሲ አንቹራቻ ሃርጋንቻ ገዲዳ ሲሞና ሶን ቁማ ቦላ ዲሸን ዋጋይ ዳሮ አልዖ ገዲዳ ናርዶሴ ጌቲቲዛ ሸቶይ ኩሚ ኡቲዳ አልባሰዒርሴ ቢልቃፆ ኦይኪዳ አሲ

* 13:28 ሃይሲ ሃ ቆፋይ ቤሲዛይሲ አሰታ ዳሬን ዲዛ ሚላቲ አጨዛይኔ ሃይላቲ ጨለሊዛይ ቦኔ ገዲዳይሳ ቤሳናሳ። * 13:34 ሉቃ 12:36-38 * 14:1 ኬሳ 12:1-27

ማጫሳያ ቢልቃጫ ማንጻዳ ሺቶዛ ዩሱፊ ሁዔ ቦላ ጉሳዲስ።
*

4 ሄን ጋዳን ዲዛ አሳታፔ ኢሲ ኢሲ አሳቲ “ሃይሲ ሺቶዚ አዛሰ ዎጋይ ባይንዳ ጉኪዜ?” ጊዲ ባ ጊደን ሃንቄቲዳ። 5 “ሺቶዚ ባይዘ ባይዚዳኮ ሄቩ ቆቱ ዲናሬፔ ቦላራ ባይዜቲዲ ማንቆታሰ አሜቴኔሺን” ጊዲ ማጫሳዮካ ካጲዳ። *

6 ጊደ አቲን ዩሱሲ ኢሰታሰ “አገቴ! ሃሮ ማጫሳዮ አዛሰ ዋይሴቲ? ኢዛ ታሰ ሎዎ ሚሽ ኦላዲስ። 7 ማንቆቲ አይ ዎዴካ አንቴናራ ዴቲስ። አንቴ ኮይዳ ዎዴ አይዴካ ኢሰታ ማዳናሰ ዳንዳዬታ ሺን ታ ጊዲኮ ኡባ ዎዴ አንቴናራ ዲኬ። * 8 ሃና ባ አላናሰ ዳንዳዩዛሪ ኬና ኦላዲስ። ታሰ ዋሳሰ ጊዳና ማላ ታ አሾ ካሴታ ቲያዲስ። 9 ታ አንቴሰ ቱሙ ጋይሰ፤ ሃይሲ ሚሺራቾ ቃላይ አላሜ ኩሜላን ሳባኬቲዛሶን አዋንካ ኢዛ ኦሌዳይሲ ኢዛ ሃሳዒሲዛዝ ጊዲዲ ሃሳዬታና” ጊዴስ።

የሁዳይ ዩሱፊ አላ አማናሰ ገጊዴሰ
(ማቶ 26:14-16፤ ሉቃ 22:3-6)

10 ሄሳፌ ጉዬ ታማኔ ናምዓታፔ ኢሶይ አሰቆርንቶ የሁዳይ ዩሱፊ አላ አማናሰ ቄሴታ ሃላቃታኮ ቢዴስ። 11 ኢሰቲካ ሄሳ ሲይዲ ኡፋዬቲዳ፤ ኢዛሰ ሚሽ አማናሰ ኢዛራ ገጊዲ። ሄሳ ገሽ ዩሱፊ አላ አማናሰ አንጄ ዎዴ ናገሼ ጋምዒዴስ።

12 ፓዚጋ ዶርሲ ሹኬቲዛ ኡኬላ ሙሳ ቦንቺዛ ኮይሮ ጋላሰ ዩሱፊ ካሊዛይቲ ዩሱሳኮ ሺቄዲ “ፓዚጋ ካዎ ማናሶ አዋን ገገሳና ማላ ኮያይ?” ጊ ኦይቺዳ።

13 ኢዚካ ባና ካሊዛይታፔ ናምዓታ “ጌዴ ካታማ ቢቲ፤ አንቴ ቢሺን ሃላ ኦቶራ ቶኪዳ አሳዴይ አንቴናራ ጋጋና። 14 ኢዚ ቢዲ ፔሊዛሶ ጋካናሰ ኢዛ ካሊቲ። ኬላዴዛሰ ‘አሰታማሬይ ኔና ታና ካሊዛይታራ ፓዚጋ ካዎ ማናሰ ታሰ ጊዲዛ አማላ ሸምፖሶይ አዋይሴ? ጊዴስ’ ገቴ። 15 ኢዚካ ቦላ ፖቄ ቦላ ዲዛ ገጊ ኡቲዳ አሆ ሶ አንቴና ቤሳና፤ ሄን ኢዛን ገገሲቲ” ጊ ኪቲዴስ።

16 ኢዛ ካሊዛይቲካ ኬዚዲ ጌዴ ካታማ ቢዳ። ዉሪካ ዩሱሲ ጊዳ ማላ ሃኒ ቤቲዴስ፤ ፓዚጋካ ሄን ገገሲዲ።

17 ጋዴይ ቃሚሺን ዩሱሲ ባና ካሊዛ ታማኔ ናምዓታራ ጋኪዴስ። 18 ኢሰቲ ማዳን ዲሺን “ታ አንቴሰ ቱሙ ጋይሰ፤

* 14:3 ሉቃ 7:37-38 * 14:5 300 ዲናሬይ ጉሲ ቤኒ ዎዴ አሳሰ ላይላ ዳዋዛ። * 14:7 ዛሬ 15:11

አንቲ ጊደፌ አሶይ አዚካ ታናራ አሲፌ ሚዛይሲ ታና አሌ አማና” ጊደሰ። *

19 አሰቲካ ሙዙቲዲ “ታኔሻ? ታኔሻ?” ጊዲ አሶይ አሶይ ዩሱሳ ኦይቸዳ።

20 አዚካ አሰታሰ “ታማኔ ናምዓታፔ አሶይ ታናራ ባ ኩሼ ኬሬን ዩዲዛዳ። 21 ካሴ ፃፌቲዳ ማላ አሳ ናይ አዛ ጊሽ ሃይቃና ሽን አሳ ና አሌ አሚዛዳሰ አዩ-አና! ሄሳዳይ ካሴ ዩሌቶንታ ኣጊዳኮ አዛሰ ሎፆኮሺን!” ጊደሰ።

ጎዳ ካዎ ኤኮ ዎጋ

(ማቶ 26:26-30፤ ሉቃ 22:14-23፤ 1ቆር 11:23-25)

22 አሰቲ ሚሽን ኡኬላ ኤኪ አንጂዲኔ ሜንሊዲ ባና ካሊዛይታሰ “ሃይሳ ታ አሾ ሄይቲ” ጊ አሚዳሰ።

23 አሻካ ዳንሊ ጋላቲዲ አሰታሰ አሚን አሰቲ ወሪካ ኡዩዳ።

24 ቃሴ ዩሱሲ “ሃይሲ ዳርታ ጊሽ ጉካና ታ ኦራላ ጫቆ ሱላ።

* 25 ታ አንቲሰ ቱሙ ጋይሰ፤ ኦራላ ዎይነፔ ጊጊዳ ኡሻ ያሳ ካዎቲላን ታ ኡያና ዎዴ ጋካናሰ ናምዓንሉ ሃይሳ ኡዩኬ” ጊደሰ።

26 ሄሳፌ ጉዩ ማዛሙሪ አሲፌ ዩዲዲ ፑዴ ዳብራዛይቲ ዙማ ቦላ ኬዚዳ።

27 ዩሱሲ “ ታ ሄሚዛይሳ ሾጫና ሄ ዎዴ አዛ ደርሳቲ ላሌታና’ ጌቲቲ ፃፌቲዳይሳ ማላ አንቲ ወሪካ ታናን ዲጴታና።

* 28 ታ ዳንዲዳይሳፌ ጉዩ ጊዲኮ ታ አንቲፌ ካሴታዳ ጋለላ ባና” ጊደሰ። *

29 ጴጥሮሲካ “አሳይ ወሪ ቆጶቲኮካ ታኒ ቆጶቲኬ!” ጊደሰ።

30 ዩሱሲካ “ታ ኔሰ ቱሙ ጋይሰ፤ ሃቺ ቃማ ኩቶይ ናምዑቶ ዋሳና ጋካናሰ ኔኒ ታና ሄሹቶ ካዳና” ጊደሰ።

31 ጴጥሮሲ ቃሰ “ታ ኔናራ ሃይቁዛኮካ ሙሉካ ኔና ካዳኬ” ጊዲ ኬሂ ሚንሊ ዮቲዳሰ። ሃንኮይቲካ ወሪ አዛይሳሶ ጊዳ።

ዩሱሲ ጌቲሴማኔን ዎሲዳሰ

(ማቶ 26:36-46፤ ሉቃ 22:39-46)

32 ሄሳፌ ጉዩ ጌቲሴማኔ ጌቲቲዛሶ ቢዳ ዩሱሲካ ባና ካሊዛይታ “ታኒ ዎሲሺን አንቲ ሃይሳን ጋምዲሺቲ” ጊደሰ።

33 ጴጥሮሳ፣ ያቆቤኔ ዮሃንሳ ባናራ ኤኪ ቢዳሰ። ኬሂ ቆፒዳሲኔ

* 14:18 ማዛ 41:9 * 14:24 ኬሳ 24:8፤ ኤር 31:31-34 * 14:27
ዛካ 13:7 * 14:28 ማቶ 28:16

ሜቶቲዳስ። 34 ቃሴካ ኢስታስ “ታ ሸምፖፖ ዳር ሜቶታዲስ ኢንቴ ሃን ዲሺቴ። ጴስኮንታ ናጊቴ” ጊዳስ።

35 ኢስታ አቻፌ ጉሉ ጌዴ ፖቂዲ ቢታ ቦላ ጉፋኒዲ ሃንኮ ሄ ሳቴያ አዛፔ አቆና ማላ ዋሲዳስ። 36 “ታ አዋዉ! ኔስ ዉሪ ዳንዳዬቴስ፤ ሃይሳ ዋዬ ፀዓ ታፔ ሃሳ። ጊዲኮካ ኔ ሸኔፔ አቴን ታ ሸኔይ ሃኖፖ” ጊዳስ።

37 ኢዚ ሄፔ ሲሚ ዩሺን ኢዛ ካሊዛይቲ ጴሲኪዳይታ ቤዩዳስ። ጴፀርሳካ “ሲሞና ጴሰካዲ? ሃራይ አቶ ሸን ኢሲ ሳቴካ ሚናዳ ናጎይ ኔና ያኒዴ? 38 ኢንቴ ፓጩን ጌሎንታ ማላ ቤጊዲ ዋሲቴኔ ሚኒቴ። አያናይ ገጌቲ ኡቴዳስ ሸን አሾይ ጊዲኮ ዳቡራንቻ” ጊዳስ።

39 ቃሴካ ቢዲ ኮይርይሳዎ ዋሲዳስ። 40 ኢዚ ናምዓንሉ ሲሚ ዩሺን ኢስታ አይፌን ጴሰኮይ ዳዒን ጴሰኪዳይታ ዳሚዳስ ሸን ኢስቲ ኢዛስ አይ ዛራናኮኔ ኤሪቤቴና።

41 ሄቫንሉ ዩዲ “ሃዒካ ኢንቴ አቺዲ ሸምፔቲ? ሃዒ ጊዳና፣ ሳቴያካ ጋካዱስ፤ ሄኮ አሳ ናይ ናጋራንቻታ ኩሸን አጴ አሜታና። 42 አኔ ኤቁቴ ቦስ፤ ታና አሉ አማናዴይ ዩዳስ” ጊዳስ።

ዩሱሲ ኦይኬቴዳሲኔ አጴ አሜቴዳስ
(ማቶ 26:47-56፤ ሉቃ 22:47-53፤ ዮሃ 18:3-12)

43 ዩሱሲ ቡር ሃሳያን ዲሺን ታማኔ ናምዓታፔ ኢሶይ ዩሁዳይ ዩዳስ። ኢዛራ ኢሲፌ ቄሴ ሃላቃታፔኔ ሙሴ ዋጋ ታማርሲዛይታፔ ኪቴቲዳ ዳር አሳይ ገላ ማሻኔ ዱርቃ ኦይኪዲ ዩዳስ። 44 ኢዛ አሉ አማና ዩሁዳይ ኢስታስ “አሳ ጊዳፌ ታ ዩሪዛዴይ ኢዛ ጊዲዳ ጊሻሰ ኦይኪዲ ሎዔሉ ናጊ ኤፊቴ” ጊዲ ካሴቴ ማላታ አሚ ዋሉዳስ።

45 ጋኪዳ ማላ ዩሁዳይ ዩሱሳኮ ሸቂዲ “አስታማሬ!” ጊዲ ዩሪዳስ። 46 አሳቲካ ዩሱሳ ኦይኪዳ። 47 ኢዛ አቻን ኤቂዳ ኢሶይ ማሻ ኮሆፔ ሾዲ ቄሴታ ሃላቃ አሸካራ ሃይሉ ቃንዒዳስ። 48 ዩሱሲካ ኢስታስ “ፓንጋ ማላ ታና ኦይካና ማሻኔ ዱርቃ ኦይኪዲ ዩቲ? 49 ዋንቲን ዋንቲን ያሳ ኬላን ታማርሳሼ ታ ኢንቴናራ ዲሺን ኦይኪቤኬታ ሸን ካሴ ዓፌቲዳይሲ ፖሌታና ማላ ሃይሲ ሃኒዳስ” ጊዳስ። *

* 14:49 ሉቃ 19:47፤ 21:37

50 ህጻን ዋዴ ኢዛ ካሊዛይቲ ወሪ ኢዛ ዩጊ ኣጊ ቢዳ። 51 ባ ካሎቴል ቁሪ ናፃላን ካሚዳ ኢሲ ናይ ዩሱሳ ካሊሺን ኣሳይ ኢዛ ኦይኪን። 52 ናዚ ናፃላ ዩጊዲ ካሎ ኪቺደስ።

ዩሱሳ ፐርዳ ዲላታኮ ሺሺዳ

(ማቶ 26:57-68፤ ሉቃ 22:54-55፤63-71፤ ዮሃ 18:13-14፤19-24)

53 ዩሱሳካ ጌዴ ቁሴታ ሃላቃኮ ኤፊዳ። ቁሴታ ሃላቃቲ፤ ዴሬ ጨማቲኔ ሙሴ ዋጋ ታማርሲዛይቲ ህን ኢሲፊ ወሪ ሸቂዳ። 54 ጳፅርሲካ ዩሱሳ ሃሆራ ካሊሺ ቁሴታ ሃላቃ ጊቤ ጋካናሰ ቢደስ። ኢዚ ህን ኡቲዲ ሃራ ኣሳታራ ታማ ሆዒሺን። 55 ቁሴታ ሃላቃቲኔ ዴሬ ጨማቲ ወሪ ዩሱሳ ዋቆናሰ ማርካታና ኣሰ ኮይዳ ሺን ዴማናሰ ዲንዳዬቤቲና። 56 ዳርቲ ኢዛ ቦላ ዋርዶራ ማርካቲኮካ ማርካታ ቃላይ ኦይኬቲቤና።

57 ኢሲ ኢሲ ማርካቲ ዴንዲዲ ዋርዶራ። 58 “ሃይሲ ኣዴዚ ታ ኣሳ ኩሺን ኬፃቲዳ ያሳ ኬላ ላላዳ ኣሳ ኩሺይ ቦቸንታዝ ሃራ ያሳ ኬላ ሄቹ ጋላሳራ ታ ኬፃና ጊሺን ኮ ሲዬዶስ” ጊ ማርካቲዳ። * 59 ጊዶ ኣቲን ኢሰታ ማርካቲሉ ኢሲ ቦላ ዋቂቤና።

60 ቁሴታ ሃላቃይካ ኢሰታ ሲንፋን ኤቂዲ “ሃይቲ ኔ ቦላ ማርካቲዛይሲ ኣዜ? ኔ ኣዛሰ ዲና ዛሪኪ?” ጊዲ ዩሱሳ ኦይቺደስ።

61 ጊዶ ኣቲን ዩሱሲ ኢሰታሰ ኣይኮካ ዛርንታ ጮው ጊደስ። ቁሴታ ሃላቃይ ቃሴካ “ኣንጃቲዳ ያሳ ናይ ኪርሰቶሲ ኔኔ?” ጊ ኦይቺደስ።

62 ዩሱሲካ ዛሪዲ “ኤ፤ ታናኮ! ኣሳ ናይ ዋልቃማ ያሳ ኡሻቻን ኡቲሺኒኔ ሳሎ ቫራራ ዩሺን ኢንቴ ኢዛ ቤያና” ጊደስ። *

63 ቁሴታ ሃላቃይ ባ ማይያ ዳኪዲ “ኡሰ ሃራ ኣዛ ማርካ ኮሺዜ? 64 ኢዚ ጫሻ ቃላ ያሳ ቦላ ሃሳይሺን ኢንቴ ሲዬዳታ፤ ሃዒቶ ኢንቴሰ ኣይ ሚሳቲዜ?” ጊደስ። ኢሰቲካ “ኢዛሰ ሃይቆይ ቤሰሰ” ጊዲ ወሪካ ኢሲ ቃላን ፐርዲዳ። *

65 ህጻን ዋዴ ኢሲ ኢሲ ኣሳቲ ኢዛ ቦላ ጨቶ ጨቲዳ፤ ኢዛ ኣይፊ ጎዚ ኦይኪዲ ኢጨሺ “ኣኔ ቲንቢቲ ዮታ” ጊዳ። ባጋይቲ ቃሴ ሻጋላን ባቂሺ ኤፊዳ።

* 14:58 ዮሃ 2:19 * 14:62 ዳኔ 7:13 * 14:64 ሉቁ 24:16

ጴጥሮስ ዩሱፍ ካዲዳስ

(ማቶ 26:69-75፤ ሉቃ 22:56-62፤ ዮሃ 18:15-18፤25-

27)

66 ጴጥሮስ ዲጌ ባጋራ ሄን ጊቤ ጊዶን ዲሺን ቄሴታ ሃላቃ ጋራዳታፔ ኢሲኒያ ያደሱ። 67 ጴጥሮስ ታማ ሆዲሺን ቲሺ ሂሰታ ጭላዳ “ኔኒ ናዚሬቴ ዩሱፍ ዳሳ ጊዲኪ?” ጋደሱ።

68 ኢዚ ቃስ “ኔ ጊዛይሳዳ ታ ኤሪኬ፤ ኔ ጊዘይሲ ታስ ጌሌና” ጊዲ ካዲዳስ። ሄሳፌ ጌዳ ፔንጌ ፖቂ ኤቂ ዲሺን ሄራካ ኩቶይ ዋሲዳስ።

69 ሄ ጋራዳያ ኢዛ ቤዩዳ ማላ ሄን ኤቂዳ አሳታስ “ሃይሲ አዳዚ ኢዛራ ዲዛ አሳታፔ አሳዳኮ!” ጋዳ ቃሴካ ሃሳያደሱ።

70 ኢዚ ቃሴካ ካዲዳስ። ጉላ ዋዳ ጋምዲሺን ሄን ኤቂዳ አሳቲ ጴጥሮስ “ኔኒ ጋለላ አሳ፣ ሄሳ ጊሽ ቱማፔ ኔ ኢሰታፌ አሳዳ” ጊዳ።

71 ጊዶ አቲን ኢዚ ቃስ “ኢንቴ ጊዛዳ ታ ኤሪኬ!” ጊሼ ጫቆኔ ባና ቃንጌላ ኦይኪዳስ።

72 ሄራካ ኩቶይ ናምዳንሉ ዋሲዳስ። ጴጥሮስካ “ኩቶይ ናምዳ ዋሳናስ ኔ ታና ሄዻ ካዳና” ጊዳ ዩሱፍ ቃላይ ኢዛስ ቆፊቲን ሂቂሚዲ ዩኪዳስ።

15

ዩሱፍ ጲላዎሳኮ ኤፊዳ

(ማቶ 27:1-2፤11-14፤ ሉቃ 23:1-5፤ ዮሃ 18:28-38)

1 ማላዶ ዋንታራ ቄሴታ ሃላቃቲ፣ ዳሬ ጨማቲኔ ሙሴ ዋጋ ታማርሲዛይቲ ኩሜላ ሻንጎ አላፌታራ ኢሲፌ ዘሬቲዲ ዩሱፍ ቃቺ ኤኪ ኤፊዲ ጲላዎሳስ አሉ ኢሚዳ።

2 ጲላዎሳካ ዩሱፍ “ኔ አይሁዳታ ካዎ?” ጊ ኦይቺዳስ። ዩሱሲካ “ኤ፣ ኔ ጊዳ ማላ” ጊዲ ኢዛስ ዛሪዳስ።

3 ቄሴታ ሃላቃቲካ ዳር ዮዖ ኢዛ ቦላ ሺሺ ሞቲዳ። 4 ጲላዎሳ ቃስ “ኔ አዛስ ኦይሻ ዛሪኪ? ሄኮ ኔና ዳር ዮዖን ሞቲቲስ” ጊዲ ቃሴካ ኦይቺዳስ።

5 ጊዶ አቲን ዩሱሲ ሃዒካ ኢዛስ አይኮካ ዛር አምንታ ጊሽ ጲላዎሳካ ማላሌቲዳስ።

6 ፓዚጋ ባባሌ ጋላስ ጲላዎሳ ዳሬይ ቢርሻና ማላ ኦይቺዳዳ ቢርሺ ዩዲዛ ዋጋይ ካሴ ዳስ። 7 ኢታ ኦሶን ዳሬ ቦላ ዳንዲዲ ሽምፖ ዋዲዳ አሳታራ ኢሲፌ ቃሼቲዳ ባርባኔ ጌቲቲዛ አሳዳይ

ደስ። 8 ዳሬይካ ዩዲ ካሴ ሎሴ ጊዲዳይሳ ኢዚ ኦፋና ማላ ጲላዖሳ ዋሲደስ።

9 ጲላዖሲካ ኢስታስ “ታ ኢንቴስ ኣይሁዳ ካዎ ቢርሻና ማላ ኮይተ?” ጊ ኦይቹደስ። 10 ጲላዖሲ ሄሳፉ ኦይቹዳይ ካሴ ቄሴታ ሃላቃቲ ዩሱሳ ቃናቲን ኣሉ ኢሚዳይሳ ኤሪዛ ጊሻሳ።

11 ቄሴታ ሃላቃቲ ቃስ “ኢዛ ኤፃ ባርባኔይ ቢርሼቶ!” ጊ ኦይቻና ማላ ዳሬዛ ዳንጮዲ። 12 ጲላዖሲ “ሂስቲኮ ኢንቴ ኣይሁዳ ካዎ ጊዛ ኣዳዛ ዋስታና ማላ ኮይተ” ጊደስ።

13 ኢስቲ ቃሴካ “ካቃ! ካቃ!” ጊ ዋሲዳ።

14 ጲላዖሲካ “ኣይ ኢታ ኦሊዳ?” ጊ ኢስታ ኦይቹደስ። ኢስቲ ቃስ “ካቃ! ካቃ!” ጊዲ ካሴፕ ኣሉ ዋሲዳ።

15 ጲላዖሲካ ዳሬዛ ኡፋይሳና ጊዲ ባርባኔ ኢስታስ ቢርሼደስ። ዩሱሳ ጋራፊዲ ካቃናስ ኣሉ ኢሚደስ።

ዎታዳራቲ ዩሱሳ ቦላ ቁሊጪዳ

(ማቶ 27:27-30፤ ዮሃ 19:2-3)

16 ዎታዳራቲ ዩሱሳ ዳሬ ሃሪዛይሳ ጊቤ ኤኪ ቢዲ ኣቲዳ ዎታዳራታ ወርሲ ሺሺዳ። 17 ዩሱሳ ዘፃ ማይፃ ማይዚዳ፤ ኣጉንፋ ኣክሊሌ ፃዲ ኢዛ ሁዒን ዋሊዳ። 18 ሃሳፊካ “ኣይሁዳ ካዎ ሳርይ ኔስ ጊደ!” ጊሼ ኢዛ ሳርሊዳ። 19 ኢዛ ሁዒ ጉፊራ ሾጪዳ፤ ኢዛ ቦላካ ጩቲዳ ጉልባቲዲ ኢዛስ ጎይኒዳ። 20 ኢዛ ቦላ ቁጵ ካዒዳፕ ጉዩ ካሴ ማይዚዳ ዘፃ ማይፃዛ ቃሪ ኤኪዲ ካሴ ኢዛ ማይፃዛ ዛሪ ማይዚዲ ካቃናስ ኤኪ ቢዳ።

ዩሱሳ ካቄቲላ

(ማቶ 27:31-44፤ ሉቃ 23:27-43፤ ዮሃ 19:17-27)

21 ኣላኪሳንድሮሳኔ ሩፎሳ ኣዎ ሰሞና ጌቲቲዛ ኢሲ ቃሪና ዳሬ ኣሲ ዳሬፕ ካታማ ዩዛይሳ ዩሱሳ ማስቃሌ ዋልቃራ ኦይኪ ቶሲዳ። * 22 ሃሳፊ ጉዩ ዩሱሳ ጎልጎታ ጌቲቲዛሶ ኤፊዳ፤ ኢዛስ ቢርሼላይ “ኣሳ ሁዒ ጉጌ” ጉሳ። 23 ካርቤ ጌቲቲዛ ጫሞራ ዋላኬቲዳ ዎይኔ ጫጃ ኡያና ማላ ኢዛስ ኢሚን ኢዚ ኤኮንታ ኢዲደስ። 24 ሃሳፊ ጉዩ ኢዛ ካቄዳ፤ ኢዛ ማይፃ ኢሳዴ ኢሳዴ ኣዋይሲ ጋካናኮኔ ጊዲ ሳማ ዩጊዲ ጊሼቲዳ።

25 ኢስቲ ኢዛ ካቄሺን ዎንታፊ ሄቩ ሳቲ ጊዲደስ። 26 ኢስቲ ማስቃሌ ቦላ ፃፊ ሺሺዳ ሞቶ ቃላይ “ኣይሁዳ ካዎ” ጊዛ ቃላ። 27 ኢዛራ ኢሲፊ ናሞዑ ፓንጋታ ኢሳ ኢዛፕ ኡሻቻራ ኢሳ

* 15:21 ኦር 16:13

ሃዲርሳራ ካቂዳ። 28 ሄሳንካ ካሴ ማፃፋይ “ኢታታራ ኢሲፊ ታይቤተደስ” ጊዳ ተንቢቲ ቃላይ ፖሌቲደስ። **

29 ኦጌራ አጂ በዛይቲካ ባ ሁዔ ቃሊሽ “ኦይ! ኦይ! ያሳ ኬላ ላላዳ ሄቹ ጋላሳን ከፃናይ ኔኔ?” ጊዳ ኢታ ጫሽ ጫዩሽ፤

* 30 “እኔ ሃዲ ማሰቃሌ ቦላፊ ዋቆዳ ኔና አሻ” ጊዳ።

31 ሄሳፊካ ቄሴታ ሃላቃቲኔ ሙሴ ዋጋ ታማርሲዛይቲ ባ ጊደን ኢሶይ ኢሳስ “ሃራታ አሽደስ ሽን ባና አሻና ዳንዳይቤና” ጊዳ ኢዛ ቁጂዳ። 32 “ኑ ኢዛ ቤዪዲ አማናና ማላ ኣኔ ሃይሲ ከርሰቶሲ ኢሰራዔሌታ ካዋይ ሃዲ ማሰቃሌፕ ዋቆ” ጊዳ። ኢዛራ ካቂቲዳይቲካ ኢዛ ቦላ ጫሽ ኮሪዳ።

ዩሱሳ ሃይቆ

(ማቶ 27:45-56፤ ሉቃ 23:44-49፤ ዮሃ 19:28-30)

33 ኡሱፑን ሳቴፔ ኦይኪዲ ኡዲፋን ሳቴ ጋካናስ ቢታይ ወሪ ቆሚደስ። 34 ኡዲፋን ሳቴ ቦላ ዩሱሲ “ኤሎሄ! ኤሎሄ! ላማ ሳባቂታኔ” ጊዳ ቃላ ቆቁ ሂሰቲዲ ዋሲደስ። ሄሳስ ቢርሽላይ “ታ ያሶ! ታ ያሶ! ኔ ታና አዛስ አጋዲ?” ጉሳ። *

35 ሄን ጋደን ኤቁዳ አሳፔ ኢሲ ኢሲ አሳቲ ሄሳ ሲይዲ “ኤላሳ ያይጌስኮ” ጊዳ። 36 ሄሳፊ ኢሲ ኣሲ ኤሌሊ ቢዲ ጫሊዳ ዋይኔ ጫጃ ኢሰፕንጃ ማላ ሚሻን ጌልሊ ከሲዲ ሚላ ያራን ኦይሊዲ ኡያና ማላ ዩሱሳስ ሽሽደስ። ሄሳፊ ቃሴ “እኔ አጋጊቲ፤ ኤላሲ ዪዲ ኢዛ ካቆፔ ዋሊሽን ኑ ቤያና” ጊደስ። †

37 ሄሳፊ ዩሱሲ ቃላ ቆቁ ሂሰቲ ዋሲዲ ሽምፖ ከዚደስ።

38 ያሳ ከሌ ማጋላሻይ ሁዔራ ዲጌ ናምዑ ከዚ ዳኬቲደስ።

* 39 ዩሱሳ ገናራ ኤቁዳ ኢሲ ማቶ ሃላቃይ ዩሱሲ ሄሳፊ ጊታ ቃላራ ዋሲዲ ሽምፖ ከዚሽን ቤዪዲ “ሃይሳዳይ ቱሙ ያሳ ናኮሽን” ጊደስ። 40 ሄሳ ዋዴ ማጫሳቲ ሃንዚይሳ ሃሆን ዲዲ ያሊዲ። ኢስታ ጊደፊ ማግዳሌፕ ዪዳ ማራማኔ ካሎቲዛ ያቆቤኔ ዮሳ አዮ ማራሚራ ቃሴካ ሳሎሚራ ኢሲፊ ዳቴስ። 41 ሃይቲ ማጫሳቲ ጋሊላን ዩሱሳ ካሊሽኔ ኢዛስ ኦሊሽ ጋምዒዳይታ። ኢስታራካ ኢሲፊ ሃራ ዳር ማጫሳቲ ዩሩሳላማ ቢዳ። *

* 15:28 ኢሲ ኢሲ ገሻ ማፃፋቲ ፓይዶ 28 ቦላ ዲዛ ቆፋ ጉጃቴስ፤ ቃላይካ ሉቃሳን 22:37 ቦላ ዲዛይሳ ሚሳቴስ። * 15:28 ኢሳ 53:12 * 15:29

ማዛ 22:7፤ 109:25፤ ማር 14:58፤ ዮሃ 2:19 * 15:34 ማዛ 22:1 † 15:36 ጫሊዳ ዋይኔ ጫጃ ካቂቲዳ ኣሲ ባ ዋዬ ባላና ማላ ኡሽቴስ። * 15:38 ከሳ

26:31-33 * 15:41 ሉቃ 8:2-3

42 ጋዳይ ቃሚ ቃሚ ቢሺን ሳምባታስ ገቢተዛ ጋላሲ ጋዜዳስ።
 43 ዳሬ ጨማታ ገደን ቦንቹቲዳ ኢሲ ኦርማቲያሳ ዳሬ ኣስ ዮሴፌ ጌቲቲዛይሲ ያሳ ካዎቴሉ ናገሼ ዲዛዳይ ባቦንታ ጰላጾሳኮ ቢዲ ዬሱሳ ኣሃ ዎሲዳስ። 44 ጰላጾሲካ ኢዚ ሂኒ ዎዴ ኤሌራ ሃይቂዳይሳ ሲይዲ ማላሌቲዳስ። ማቶ ሃላቃ ዪይገሲዲ “ኢዚ ሃይቂ ጋምዒዳ?” ገዲ ኦይቹዳስ። 45 ኢዚ ሃይቂዳይሳ ማቶ ሃላቃይ ጌሺ ኤሪዳፔ ጉዬ ዬሱሳ ኣሃ ዮሴፌስ ኢሚዳስ። 46 ዮሴፌካ ሞጎ ማይያ ሻሚዲ ኣሃ ማሰቃሌፔ ዎሊዲ ሞጎ ማይያን ፃዲ ሹቻፌ ዎጩቲዳ ዳሬን ሞጊዳስ። ዳፋ ዳና ሹቻራ ጎርዲዳስ። 47 ማግዳሌፔ ዪዳ ማራሚራኔ ዮሴፌ ኣዮ ማራሚራ ዬሱሳ ኣሃ ኣዎን ሞጊዳኮኔ ቤዪዳ።

16

ዬሱሲ ሃይቆፔ ዳንዲዳስ
 (ማቶ 28:1-8፤ ሉቃ 24:1-12፤ ዮሃ 20:1-10)

1 ሳምባታይ ኣዲጃፔ ጉዬ ማግዳሌ ማራማ፡ ያቆቤ ኣዮ ማራሚራኔ ሳሎሚራ ኢሲፌ ቢዲ ዬሱሳ ኣሃ ቲያናስ ሺቶ ሻሚዳ። 2 ሳሚንታፌ ኮይሮ ጋላስ ማላዶ ዎንታራ ቡሮ ኣዎ ኦርሼይ ኬዚዳ ማላ ዬሱሳ ዳሬኮ ቡሮ ቢሺን፡ 3 “ዳሬዛ ዳናፔ ሹቻ ኮስ ኦኒ ገነዳርሳኔ?” ገዲ ባ ገደን ሃሳዬቲዳ።

4 ኢስቲ ጶቁ ገ ዪሊሺን ዳሮ ገታ ሹቻይ ዳሬዛ ዳናፔ ገነዳሪዳይሳ ቤዪዳ። 5 ጌዴ ዳሬዛ ገዶ ጌሊዳ ማላ ኢሲ ቦሳ ማይያ ማይዒዳ ፓንሳ ኡሻቻ ባጋራ ኡቲዳይሳ ቤዪዲ ዳጋሚዳ።

6 ኢዚ ቃስ ኢስታስ “ዳጋሞፍቲ! ኢንቲ ካቂቲዳ ናዚሬቲ ዬሱሳ ኮዬታ፤ ኢዚ ዳንዲዳስ ሃን ዳና፡ ኢስቲ ኢዛ ዎሊዳሶ ሃይሳ ቤይቲ። 7 ገዶ ኣቲን ኢንቲ ቢዲ ኢዛ ካሊዛይታሲኔ ጰፅርሳስ ካሴ ኢንቲስ ዮቲዳ ማላ ኢንቲፌ ካሴቲዲ ኢዚ ጋሊላ ባና። ኢንቲ ኢዛ ህን ዳማና ገዲ ኢስታስ ዮቲቲ” ገዳስ። *

8 ማጫሳቲካ ማላሌቲሼኔ ኮኮርሼ ዳፋፔ ኬዚ ባቃቲዳ። ባቢዳ ገሽ ኦናስካ ኣይኮካ ቃቲቤቴና። *

* 16:7 ማቶ 26:32፤ ማር 14:28 * 16:8 ኢሲ ኢሲ ቤኒ ገሻ ማፃፋታን ፓይዶ ኦስፑናፔ ጉዬ ዲዛ ቆፋይ ሃይሳፌ ካሊዲ ፃፊቲዳስ። ማጫሳቲ ጰፅርሳኮኒ ባ ላጌታኮ ቢዲ ከታንቻዚ ኢስታስ ዮቲዳይሳ ኡባ ኢስታስ ዮቲዳ። ሄሳፌ ጉዬ ዬሱሲ ኣሺዛ ላሜቶንታ ገሻ ሚሺራቾ ቃላ ኣዎ ኦርሼይ ሞኪዛሶፔ ዉሊዛሶ ጋካናስ ባና ካሊዛ ታማራታ ባጋራ ከቲዳስ።

9 ሳማንታፊ ኮይሮ ጋላስ ዋጋ ዋንታ ማላደራ ኢዚ ሃይቆፔ ደንዲዳፔ ጉዬ ዩሱሲ ኢዚፔ ላፑን ዳይዳንሉ ከሲዳ ማግዳሌ ማራሚስ ኮይሮ ቤተዳሰ። † 10 ኢዛካ ባዳ ካሴ ኢዛራ ዲዛይቲ ካዮተሼኔ ዩኪሼ ዲሺን ዳማዳ ዮታዲሰ። 11 ኢስቲ ዩሱሲ ፓፃ ዲዛይሳኔ ኢዛ ታ ዩሱሳ ቤያዲሰ ገዳይሳ ሲይዲ ኣማንቤቴና።

ዩሱሲ ባና ካሊዛ ናምዓታስ ቤተዳሰ (ሉቃ 24:13-35)

12 ሄሳፌ ጉዬ ኢዛ ካሊዛይታፔ ናምዓቲ ጌዴ ዳሬ ጋርስ ቢሺን ዩሱሲ ኢስታስ ሃራ ኣስ ሚሳቲ ቤተዳሰ። 13 ኢስቲካ ሲሚዲ ሄሳ ኢዛ ካሊዛይታፔ ኣቲዳይታስ ዮቲዳ። ገዶ ኣቲን ኢዛ ካሊዛይቲ ሲይዲ ኣማንቤቴና።

ዩሱሲ ባና ካሊዛ ታማኔ ኢሲኔታስ ቤተዳሰ

(ማቶ 28:16-20፤ ሉቃ 24:36-49፤ ዮሃ 20:19-23፤ ሃዋ 1:6-8)

14 ሄሳፌ ጉዬ ታማኔ ኢሲኔቲ ማዳ ቦላ ዲሺን ዩሱሲ ኢስታስ ቆንጨዳሰ። ኢዚ ሃይቆፔ ዳንዲን ኢዛ ቤዩዳ ኣሳቲ ኢስታስ ዮቲን ሲይዲ ኣማኖንታ ኣገዳ ገሽ ኢስታስ ኣማኖይ ባይንዳይሳኔ ኢስታ ዋዝና ሙሜቴላ ገሽ ኢስታ ቦሪዳሰ። 15 ኢስታሲካ “ኣላሜ ኡባሶ ቤቴ፣ ሚሺራቾ ቃላ ሜዴቴላ ኡባሶ ሳባኪቴ። * 16 ኣማንዳይኔ ፃማቂቲዳይ ኣታና። ኣማኖንታይ ገዲኮ ፒርዳታና። 17 ታና ኣማኒዛይታ ሃይቲ ማላታቲ ካላና። ኢስቲ ታ ሱንላን ዳይዳንላታ ከሳና፣ ኦራላ ቃላንካ ሃሳያና። 18 ኢስቲ ሾሻታ ባ ኩሼራ ኦይካና፤ ዋዲዛ ማርዜ ኡዩኮካ ኢስታ ቆሃና። ባ ኩሼ ሃርጋንቻታ ቦላ ዋሊ ዋሲኮ ሃርጋንቻቲ ፓፃና” ገዳሰ።

ዩሱሲ ፑዴ ሳሎ ቢዳሰ (ሉቃ 24:50-53፤ ሃዋ 1:9-11)

19 ጎዳ ዩሱሲ ሄሳ ዮቲዳፔ ጉዬ ፑዴ ሳሎ ዳንዲ ቢዲ ያሳ ኡሻቻን ኡቲዳሰ። 20 ኢዛ ካሊዛይቲ ሄሳፌ ከዚዲ ኡባሶን ኣዲ ኣዲ ሳባኪዳ። ጎዳይካ ኢስታራ ኦሊዳሰ። ኢስታ ቲሚርቴዛ ኤኪዲ ኦሊዛይታስ ባ ዮቲዳ ቃላካ ማላታ ኦሊ ኦሊ ሚንሊዳሰ።

† 16:9 ኢሲ ኢሲ ቢርሼላታኒኔ ኢሲ ኢሲ ሃራይታፔ ዳቂቲዳ ጌሻ ማፃፋታን ፓይዶ 9-20 ጋካናስ ዲዛ ቆፋይ ያፊቲቤና። * 16:15 ሃዋ 1:8

ኦሪሳ ጩቆ ማፃፋ ንሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 29 Sep 2022 from source
files dated 29 Jan 2022
dffa0cbb-5f77-5875-bf95-f4176677af45